

Pauro Korītiō ezeḱtsa bo ziwatahakazo

Wastuhu Korītiō ezeḱtsa Pauro ziwatahaka naha humo batu siakparawy. Iwatahi ziwatahakazo tahyrikosokdawy soho humo nisispirikpoko. Deus Pauro tuk ziknapykyrykta hi iwatsahi katsa kino niwatihi Deus soho humo tanymyryky.

¹ Uta Pauro, Sesus Kiristu ykzohota iwa hi Deus nizihikik. Ikiahatsa Korītiō ezeḱtsa bo piwataha. Asaktsa Deus tyryktsa, Akaija ezeḱtsa bo niwatihi piwataha. Asahi Sesus harere bo hyÿ nikaranaha. Timoteo humo katsa mymypokzitsirētsa mytsy wata atahi katuk ahabo piwatahaka.

² Deus myzo Sesus Kiristu mypehakatsa iwaze sibo mopamykysokoze utakta:

— O myzo Korītiō ezeḱtsa tysipokzitsihikikta! Sibo tysisapywyky iwaze batu paikpa mytsaty mykaranaha sakurētsa mykaranaha — my. Iwa Deus bo ahatsyhyryze mopamykysoko.

Pauro Deus humo tsakurēta nikara.

³ Katsaktsa Deus bo tihiktsa:

— O Deus myzo ikia zuba tsamysapyrēta ikia hi mypehakatsa Sesus Kiristuzo. Ikia zuba myhumo tsamypokzitsiukrēta, iwatahi myzo babata — tsimaha. ⁴ Atahi sinini tsimykarana-haze mymytsumuēhī. Paikpa mytsaty tsimykarana-haze mymykuwyky. Deus hi:

— Pahatsumuēhī ikiahatsa niwatihi ustsakytša sinini mykaranahaze tysitsumuēhīnaha

iwahi natatsihikik — iwa myhyrinymyrētsa Deus hi nimyhyrinymyryky. ⁵ Kiristu mytsyhyryze sinini nikara. Katsa kino niwatihi Sesus Kiristu humo tsikspirikpokonahaze ihumo sinini tsimykaranaha. Iwatsa tu sinini tsimykaranaha zeka atahi mymykuwyky. Iwatsahi ihumo mypunihikrētsa tsimoziknaha.

⁶ Tapara ahabo iktsasoko Deus nimytsumuēhīkī nawa Deus mymytsapuhyripyrywyky Kiristu mysapyzekenihyrikosokda iwatsahi sinini ykarawy bo batu zikaha. Kytsa asaktsa Deus batu siakparawy mymysukyrykynaha. Mymysukyryikiknahaze Deus mymytsumuēhī atahi mymykuwyky ana humo kino ahahyrinymyrētsa. ⁷ Iwaze uta ahasoho humo kaspihikrēta. Ikiahatsa hi:

— Hawa Deus kytsa mysitsumuēhīkīkze iktsa tsimaha, iwatsahi asaktsa Deus batu siakparawy mymysukyrykynahaze Deus mymytsumuēhī, ihumo mypunihikrētsa tsimoziknaha iwahi ustsakytša mysitsumuēhīkī niwatihi — tsimaha.

⁸ Katsaktsa Asia eze tuze hawa tsihokdaharēna imysapybara ty mybo nikara. Anahi ahabo mot-sasoko iwaze tsinymyrykynaha. Kytsa nimyit-sapyriwykynaha. Sinini tsikykaranaha. Iwaze mypetu tsikykaranaha:

— O abahi katsa tsimyokbanahatsa watsa. ⁹ Ustsakytša kytsa mymybanaha bo — mytsaty tsikykaranaha. Iwa mytsaty ahabyitsa tu tsikaha. Batu mypunihik. Iwaze mspihikbyitsa tu tsimykaranaha. Iwaze Deus zuba mymytsumuēhī ana humo hi myhyrinymyrētsa. Ata zuba siakbatsa mynasihyrykypowy. Iwaze sinini

tsimykaranahaze batu mytsaty tsimykaranaha — O katsa mypunihikrētsa tsimaha — iwa batu mypetu mysopyk. Ihumo zuba mypunihikrētsa iwa Deus nimyhyrinymyryky. ¹⁰ Ata pokzi hi kytsa nimybakzyzykynahaze nimitysumuēhīkī iwatsahi tsikwaknaha. Iwaze katsaktsa:

— O atahi mymytsumuēhīekik iwaze ihumo myspirikporētsa — tsimykaranaha. ¹¹ Iki ahatsa niwatihi Deus bo mytsyhyryze tsimypamykyson-ahaktsa! Mytsyhyryze Deus bo tsimypamykyson-ahaze Deus mymytsumuēhīkī. Isapyrēnikia ty mybo nyny my. Myhumo tsimypokzitsiukrēta iwaze kytsa ipe:

— O myzo Pauro tuktsa humo niwatihi sihumo tysipokzitsiki, ikia zuba tsamysapyrēta — maha. Iwa kytsa sizubarētsa Deus humo sakurētsa maha.

Pauro ta soho humo meky watu nikara.

¹² Iwaze mypetu mysopyk katsaktsa wasani tsimykaranaha, Deus humo wasani mysopyk. Iki-ahatsa humo hi tsimypokzitsiukrētsa iwatsahi mykurētsa. Deus humo ahabo simypokzitsirētsa batu ahabo zuba tsikykaranaha. Deus mymytsumuēhīkī iwatsahi wasani tsimyzurukunaha ana humo hi mykurētsa.

¹³ Iwatsahi ahabo tsiwatahakanahaze ihokdahabara ty tsikykaranaha ipiktsīhibara ty zuba tsikykara naha tsimyspirikponaha. Abaka iwa ape icy hỹ tozeka ja tsimyspirikpo ¹⁴ Iki ahatsa tsikaeni zuba mysoho humo tsinymyrynaha. Uta hi: — Aibani tsinymyrybabanahaze myhumo ahakurētsa — iwa mozihikik. Sesus Kiristu mypehakatsa myziksizoze myhumo ahakurētsa mywatsa ahahumo mykurētsa.

15-16 Niytahi utakta ahabo mytsaty ikykaraze iknakozore tsihikik Masedonia bo moparakze:

— O Masedonia bo moparakze Korītio ezektsa bo mynakozore. Myziksizoze niwatihi Korītio ezektsa bozo my. Nawa petok babaha sibo mynakozore iwatahi mysihyrinymyryze sakurētsa. Sudeja bo my zeka piktsumuēhīnaha — iwa mytsaty ikykara. ¹⁷ Anasoho ty ba ziky. Ana humo hi tsipiksapybyikinaha. Ahaokze ka — O Pauro hawa sa mykara batu ihyrinymyry. Batu ispirikpo batu imysapy — tsimaha. Iwa kasoho humo mytsaty tsimykaranaha. ¹⁸ Iwa batu ba my. Deus ba zikmyspihikbata, Deus ta wasape zuba mykara. Uta kino niwatihi batu mybarapetu kasopyk. Wasape mykara iwata wasani mykara. Deus ana humo hi tsihyrinymyrēta. Ikiahatsa batu tyso:

— O Pauro hawa motsaso zeka wasani ja mykara — Iwa batu tyso. ¹⁹ Utakta Deus wasania ty Sesus Kiristu soho ahabo iktsasoko. Timoteo, Siras ahatsa katuk Sesus Kiristu Deus tse babata ziknatsasoikiknaha. Hawaha isoho ty tsiktsasonaha wasani ana harere humo hi wasape my. ²⁰ Deus mype:

— Hawa tisapyrēna my pahasapywyky — my. Sesus Kiristu humo hi imysapyrēna ty mybo nyny my. Katsaktsa:

— Hawa haty Deus mybo nitsasoko atsatu wasani mykara. Iharere mybo tsizubarēna. Kiristu humo zuba iharere bo yh̄y mynakara. Iharere baba zuba. Iwa kytsa sizubarētsa bo tsimytsasonaha. Iwatsahi kytsa hi: “O Deus tsamysapyrēta” — mykaranaha. ²¹ Deus hi mymytsumuēhīekik. Katsaktsa ikiahatsa kino

niwatihi Kiristu tyryktsa tsimoziknaha ana humo hi nimywatawy. ²² Mynaro mynamy humo tsiwatahanaha iwatsahi kytsa mynamy humo sihyrinymyrētsa. Iwatahi Deus hyrikoso mytuk mynapykyryk Deus tihi: — Asaktsa kahyrytsa — mykara. Deus hyrikoso mytuk mynapykyryk zeka iwaze usa isapyrēnikia ty mybo nyny my.

²³ Deus okze ahabo motsasoko. Iokpyryktyatu batu. Ikiahatsa bo mynakozore zeka pahabet-sakak. Pahabetsakak zeka ahasukatsihikrētsa tsimoziknaha. Iwatahi batu ahabo zuk. ²⁴ Ikiahatsa botu Sesus harere bo hyÿ tsimykaranaha. Katsaktsa batu ahapehatsitsa, tsipahatsumuēhĩ tsihikiknaha. Sesus harere bo hyÿ tsimykaranaha zeka ihumo ahaspirikporētsa ana humo hi tsipahatsumuēhĩkĩnaha, iwatsahi ahakurētsa tsimoziknaha.

2

¹ Iwaze kapetu kasopyk:

— Tapara Korītio ezektsa kaharere humo batu siaku iwatahi batu mysibetsakzo — iky iwatahi batu ahabo zuk. ² Kaharere humo ahasukatsihikrētsa zeka batu aty tohi pikykuwyky. Ikiahatsa pahasuka tsihikikwyky ikiahatsa zuba tsipikykuwykynaha. ³ Iwatahi batu ahabo zikumu papeu humo iwatahaka, kawataha papeu humo ky zahabetsakak:

— Ahamysapybyitsa tu tsikykaranaha tsimoewynahaktsa! — iky. Ahabo pomoze katy sukatsihikbyri zeka ba zikumu. Tsikykuwykynahaktsa kytsa! Kakurēta zeka ikiahatsa kino niwatihi ahakurētsa tsimoziknaha hÿ. ⁴ Ahahumo kasukatsihikrēta iwatahi

papeu humo ahabo iwatahaka. Ahapokzi ikpuziuku. Ahapokzi paikpa mytsaty mykara. Anapapeu humo iwatahakaze ahasukatsihik byihuja ahaspirikpowy bete pahahyrinymyryky. Ahahumo kamypokzitsiarēta tu iwahi papeu humo iwatahaka.

Deus mymysapuhyripyrywyky.

⁵ Atakta ahatuk imysapybyita ziknakara ihumo batu kaku. Wastuhu ikiahatsa tuk ihumo ahasukatsihikrētsa. Niwazubaktsa! Isoho botu ahabo iwataha hawa ipe my zeka mymybetsakak iwa botu iwataha. ⁶ Kytsa sizubarētsa ahatuk zibetsakaknaha iwatahi batu zimyizo. Niwazubaktsa.

⁷ Abaka imysapybara ty ziknakara naha ty tsiokzohiknaha. Tsitsumuēhīnahaktsa! Atahi tisukatsihikrēta zeka tsiakuwykynahaktsa kytsa! Tisukatsihikrēta tu Deus imysapybara tu ziokzohik. Ikiahatsa kino niwatihi tsokzonahaktsa anaharere humo tsimyspirikpo zeka ana ty tsitsumuēhīnahaktsa. Iwa zeka iaku byita mozik. ⁸ Ibo tsipisapywykynahaze iwa ikiahatsa ihumo ahamypokzitsiukrētsa ana humo hi tsihyrinymyrēta. ⁹ Ahabo iwatahaze — Kaharere bo hȳy tsimaha ja. Batu kanyhy — iky. Iwaze iwatahaka. Abaka kahyrinymyrēta. Iwatatuze batu ahabo kozoreze kaharere ty papeu humo iwatahaka ana humo hi tykaranaha.

¹⁰ Atakta imysapybyita ziknakara ihumo batu kaku. Ikiahatsa imysapybyita tu mykara tsiplikzohiknaha zeka uta kino niwatihi, imysapybara ty nikara piokzohik. Kiristu okzeka imysapybara ty piokzohik. Abaka katsa batu mysukatsihik. Wasani my. ¹¹ Satanas mymysapybyiriki iwa

botu mytsaty mykara, katsaktsa mysapybyitsa tu tsimykarana ana humo kino mymymywyky. Iwa myzihik zeka myhyrinymyrētsa iwatsahi batu yhỹ tsimaha.

Pauro Toroade eze paikpa mytsaty nikara.

¹² Toroade bo ikzumuze Deus wasania ty Sesus Kiristu soho Toroade ezektsa bo iktsasoko. Hawa maku ziskezozekba buruhuwa babatu zipoba anawaha mypehatsa Kiristu zikpeha, Deus wasania ty Toroade ezektsa bo motsaso. Anaeze Deus harere piwaby tsihikiknaha iwaze Deus wasania ty kytsa bo iktsaso. ¹³ Iwa zeka paikpa mytsaty ikykara. Titu katsy wata batu tyhobyk Toroade eze. Iwaze Toroade ekze ikparak. Masedonia bo ikukuru anaeze Titu paikpa ikziberiki.

Kiristu izikwyrēnikita.

¹⁴ Kytsa niwatsorokonahaze aty ipaikanikita ustsya kytsa nisioktyhyryknahatsa. Isukyrytsitsa sitsipa humo nisioktyhyryknaha. Ihudikhudikwy bo izumunahaze isukyrytsitsa iapik nisioktyhyryknaha. Sizubarētsa isukyrytsitsa bo iktsa nikaranaha. Anawahi Deus zikwy humo mypunihikrētsa tsimoziknaha, ihumo zuba katsaktsa ipaikanikita watsa tsimoziknaha. Iwatsahi kytsa sizubarētsa mybo iktsa mykaranahaze katsaktsa Kiristu tuktsa tihi hỹ ana humo hi sihyrinymyrētsa. Iwatsa nanabyitaba tsimykurunaha. Deus wasania ty tsimytsasokonaha. Wasaniha ty tsimytsasokonahaze jokmorēnikia waha my. Kytsa jokmorēnikia okmore waha iwa Deus

mymypeha wasania ty jokmorēnikia waha my nanabyitaba jokmorē. Iwatsahi Deus pe:

— O Deus ikia zuba tsamysapyrēta — tsimaha.

¹⁵ Tubabatu Deus wahoro zubata eze ziknapamykysokonahatsa jokmorēnikia ty zikoroko iwaze zatata tisapyrēna jobo Deus bo nido. Ana zatata waha tsizubarēna ty nu nikaranaha. Iwata katsakta Kiristu harere bo zuba hȳ tsimykaranaha ana bo hi kytsa sizubarētsa iktsa mykaranaha. Asakta simysapybyitsa nikaranaha sihumo Deus mysiokzohik mybo iktsa maha. Utsakta sinini ykarawy bo mykaranaha asa kino niwatihi mybo iktsa mykaranaha. Iwa sizubarētsa mybo iktsa mykaranaha.

¹⁶ Simysapybyitsa sinini ykarawy bo sisapy, katsakta Kiristu tuktsa sihumo zatata nihyrikosokdata hōrō wata.

Utsa simysapybyikitsa tu nikaranaha iwaze Deus mysiokzohik asa humo kino niwatihi katsa Kiristu tuktsa zatata jokmorēnikia wa iwaze mysiakuwyky. Batu aty tohi Kiristu harere kytsa bo mysihyrinymyryziuku. Atakta Deus zikwy zuba ituk motsasoziuku. ¹⁷ Ata zikwy hi mytuk mynapykyk iwatsahi Deus harere tsimytsasoziukunaha. Deus mype niy:

— Wasaniha ty kytsa sizubarētsa bo tytsasokonahaktsa! Kahyrikoso ahatuk mynapykyryk iwa kaharere tsimytsasoziunaha — niy. Katsakta kytsa humo batu mospihikbata. Utsa kytsa okyrysaro humo zuba Deus wasania ty motsasokonaha, katsakta batu. Kiristu sopyk humo

ma tsimykaranaha iwaze iokzeka tsimytsasokonaha mypubaraty tsimytsasoziukunaha.

3

Aibaky Deus harere.

¹ Asaktsa pahamyikinaha katsaktsa mahani siwatsabyitsa. Asahi:

— Hana bo sa papeu, haneze sa iwatahaha ikiahatsa wasani ahasopyk — maha. Katsaktsa mysapyrētsa ana humo hi ahahyrinymyrētsa. Papeu mysoho batu tsimyzihikiknaha. Ikiahatsa ustsakytza bo ty moso tsipiwatahakanaha batu tsimyzihikik. ² Ikiahatsa mypapeu waha tsimaha. Kytza iwatahaha pinymyrykynahaze iwaze anaharere humo sihyrinymyrētsa. Kytza sizubarētsa ahabo iktsa mykaranahaze asahi:

— O Korītiō ezektsa wasani zikzurukunaha. Pauro wasani nisihyrinymyryky mahani tymyi tsimysapyrēta — maha. Iwa maha ahamysapybara tsimoewynaha ana bo hi iktsa mykaranaha ana humo hi kahyrinymyrēta.

³ Ikiahatsa papeu waha tsimaha. Kiristu papeu humo ziwatahaka nahawa. Utakta karata papeu wata zikpeha zuba. Atahi iharapuktsaysikwaka ty iwatahabara. Harahare ukpe humo iwatahabara. Deus hyrikoso ata humo hi zuba katsaktsa Kiristu sopykyryktsa tsimyzurukunaha, atahi ispitu mykara. Ata humo hi zuba tsimyarape pokzitsikinaha. Katsaktsa Deus wasania ty ahabo nitsasoko, ata humo hi zuba Sesus harere bo hyÿ tsimykaranaha. Iwatsahi ahamysapyrētsa tsimoziknaha ana ty hi kytza sizubarētsa bo karata waha ty.

⁴ Deus okze myspirikporētsa. Kiristu harere bo hỹ tsimykarannahaze kino ihumo zuba myspirikporētsa tsimoziknaha, iwatsahi wasaniha tsimytsasoziukunaha. ⁵ Deus myty tsumuēhī byizeka wasaniha kytsa bo ba ziktsaso. Deus zikwy humo zuba wasania ty tsimytsasokonaha. ⁶ Ata hi tazikwy ty mybo nyny niy. Nanabyitaba izikwy humo Deus harere wasania ty tsimytsasoziukunaha. Mybarawy ezektsa bo sizubarētsa ityryktsa mozihikik iwatahi mynamytsumuēhīkī. Deus wasaniha iharere ezytyk my. Anaharere ty mybo nitsasoko. Anaharere humo wasani tsimykarannaha. Tsimyhyrikosokdanaha zeka iharere humo mywahi Deus tuk tsimynapykyknaha. Deus hyrikoso anaharere humo mymyhyrinomyryky. Deus harere, Moises bo nitsasoko ipehawy iwaze kytsa zuba Deus tuk tawahi ba ziknapykyknaha. Kytsa tahaharere humo wasani nizihikiknaha. Batu ba. Taha bo zuba mybarapetu mykarannaha. Tahaharere humo mohyrikosokdanahaze batu tawahi Deus tuk ziknapykyknaha. Deus wasania ty zuba mykara. Ihyrikoso mytuk ana harere mymyhyrinomyryky ana humo hi zuba mysapyrētsa tsimoziknaha.

⁷ Moises Deus harere ibyky mymyhyrinomyry hawa batu mysapy tsimaha. Anaharere haraharetsa siokpeziurētsa humo ziwatahaka. Deus imysapyrēnikita tu anaharere Moises bo nitsasokoze hawa tisapyrēna natakaha. Iwatahi Isareu tsekokatsa Moises ok bo batu iktsa zikaha. Tsioksapyrēta niyze iwatsahi kytsa ibo batu iktsa zikaha. Bykyze iok karipu karipuk ityh̃wy

hana bo ja niy. Katsaktsa iharere bo batu hỹ tsimykaranaha zeka tsimyhyrikosokdanahaze Deus tuk mywahi ba ziknapykyknaha. Iharere mymyhyrinymyryky katsaktsa batu mysapy tsimaha. ⁸ Abaka Deus hyrikoso mytuk mynapykyryk anahi wasanikia. Ihyrikoso mytuk mynapykyk atahi isapyrēnikia. ⁹ Deus harere Moises bo nitsasoze anaharere tisapyrēna. Anaharere humo hi Deus mype niy:

— O hawaha ty tsikykaranaha batu imysapy my — nikara. Myhyrikosokdanahaze Deus tuk tahawahi ba ziknapykyknaha. Deus okzeka batu mysapy anaharere humo hi tisapyrēna. Abaka Deus harere ezytyk, wasania ty aba zubaha anaharere bo yhỹ tsimykaranaha zeka Deus okzeka mysapyrētsa tsimoziknaha. ¹⁰ Tapara Deus harere Moises bo nitsasokoze tisapyrēna bo iktsa niy. Abaka Deus harere ezytyk wasania ty anaharere hi aba zuba tisapyrēnikia ty. Hawa anaharere mymyhyrinymyrykynahaze Deus okzeka mysapyrētsa tsimoziknaha iwaze anaharere ezytyk isapyrēnikia ty my. ¹¹ Iharere taparaka tisapyrēna. Deus tihi:

— Anaharere humo yhỹspyk tsimykaranaha anahi mozihikik. Bykyze kaharere ezytyk motsasoko anatyhi ahawahi yhỹ tsimykaranahaktsa kytsa! — niy. Deus wasania ty zuba isapyhababa motsasoko.

¹² Iwaze katsaktsa mywahi Deus tuk tsinapykyryknaha ana hi taperyky. Deus mymysapywykik ana humo hi myhyrinymyrētsa. Iwatsahi batu mysikpyby, batu ba Deus wasania ty kytsa sizubarētsa bo tsimyzihikiknaha.

¹³ Katsaktsa batu Moises watsa. Atahi panu ty taty harasuk ziknakara. Isareu ezektsa iok karipu karipuk humo ky ityhỹwytša hana bo ja iwatsahi ibo batu iktsa niaha.

¹⁴ Isareu ezektsa Moises sopykwy tsikaeni zuba zinymyrykynaha. Deus harere humo tsikaeni zuba sihyrinomy. Maku wata atakta panu ty taty harasuk niy. Abaka atsatu. Deus harere sihumo tsihokdaharēna iwatuze iharere taparaka zinymyrykiknaha anaharere humo batu sihyrinomyry. Kiristu zuba mysitsumuēhĩ iwaze asahi iharere bo hyỹ mykaranaha zeka anaharere mypubara ty pinymyrybanaha.

¹⁵ Abaka Moises sopykwy pinymyrynahaze tsikaeni zuba sihyrinomyrētsa asahi maku watsa panu ty taty harasuk harasuk sisopyk. ¹⁶ Aty zeka:

— Sesus mypehakatsa harere bo hyỹ tsimykara kyze Deus harere ty tsinymyrybaba. Deus papeu humo: “Deus panu ty Moises harek humo ky zihaktahik” — niy. Isareu ezektsa niwatihi Deus harere bo yhỹ maha zeka Deus sipanu waha pihaktahik iwa iharere ty pinymyrybabanaha. Katsaktsa mysapybyitsa tu tsikykaranaha Deus mymyokzohik. Kyze amy ty panu waha ty harasuk ty Deus pihaktahik iwaze ihumo myspirikporētsa tsimoziknaha.

¹⁷ Ana waha mypehakatsa Deus hyrikoso kino niwatihi atsatu maha. Ata humo hi meky watu tsimoziknaha iwatsahi Deus tuk mywahi tsimynapykyryknaha. Iharere humo ahapybybyihu ja! Deus okzeka ihumo mysapyrētsa tsimoziknaha. Wasani tsimykaranaha Deus wasaniha humo meky watu tsimoziknaha.

18 Katsaktsa botu Sesus mypehakatsa harere bo hyĩ tsimykarana. Katsaktsa batu kytsa watsa asaktsa panu ty taharek nasihareksukunaha. Batu ba. Mypehakatsa hyrikoso humo mysapyrētsa tsimoziknaha. Sesus wata tsimoziknaha. Katsaktsa moknywy watsa tsimaha. Kytsa mybo iktsa mahaze Sesus mypehakatsa hyrikoso mytuk pinykynaha moknywy wata. Iwatsahi mysapyrētsa tsimoziknaha pibiyituhukutu Sesus wata mysapytohitsa tsimoziknaha.

4

Deus isapyrēnikia ty mybo nyny my.

¹ Deus mymysapywyky iwaze tarabaja humo nimypeha. Tubabatu mype niy:

— Nanabyitaba wasania ty myzubarētsa bo paikpa tynatsasokonahaktsa — niy. Iwatsahi mykurētsa. Mytarabajawy humo ba mykubyri zikzumu. ² Hawa batu mysapy kytsa papatu tsipireknaha. Hawa tsimyzurukunaha wasani tsimykarana iwatsahi batu mysikpyby. Deus okzeka wasani tsimykarana ana humo hi kytsa sihyrinymyrētsa. Hawa batu imysapy tserekaiknaha. Katsa ba ziksispihikbatana, Deus harere humo batu mysimi. Wasaniha ty zuba tsimykarana. Deus harere mypubara ty zuba tsimytsasoziukunaha iwaze kytsa mysoho motsasonaha:

— O asaktsa wasani motsasokonaha siharere wasape — mykaranaha.

³ Katsa Deus wasaniha humo tsiktsasoikiknaha. Anaharere kytsa bo tsihokdahaṛēna zeka asaktsa sinini ykarawy bo maha, sihumo

hi myharere tsihokdaharēna. ⁴ Asaktsa Satanas hyrikoso sapybara pehatsa sibo mybarapetu mykara. Atakta mybarawy ezektsa Deus wata isopyk mozihikik. Ihumo hi imysapybyikia bo zuba mytsaty mykaranaha. Asahi sihyrizikubyitsa watsa. Unata pyrik mykaranahatsa watsa. Deus wasania ty okoro eze kywa. Hawa mozurukunaha sihyrinymyrētsa batu pyik pyik zikaha. Kiristu imysapyrēnikita myhyrinymyrētsa. Deus wasania ty ana ty hi nimyhyrinymyryky. Kiristu Deus wata, wasaniha humo myhyrinymyrētsa. Asaktsa sinini ykarawy bo maha ana humo hi batu sihyrinymyry. Deus wasaniha humo batu sihyrinymyry. Sesus harere bo hỹbyri nikaranaha iwatsahi batu sispirikpo. ⁵ Katsaktsa mypetu ba zikaha:

— O myharere bo hyỹ tsimahaktsa! — iwa ba zikaha. Katsa hi:

— O Sesus Kiristu harere bo zuba hyỹ tsimahaktsa kytsa! Ipe: “Ikiahi aba zubata” tsimahaktsa! Iwa pykyhytutaha iharere humo zuba hyỹ tsimykaranaha — tsimaha. Katsa ja. Kiristu mymysapywyikik iwatsahi ihumo tsipahatsumuēhīnaha. Ipokzi ahatsyhyryze tarabajaziu tsimykaranaha. Iwa hỹ.

⁶ Isuknihyize iwororo babyize Deus tihi:

— Okoro tu zik — niy. Atsoko okoro yzik niy. Atahi okoroze tu waha isapyrēnikia ty mybo piwatawy. Mymyhyrinymyry. — Kamysapyrēnikita. Kapunihikrēta — anatyhi mymyhyrinymyryky. Kiristu iwata, imysapyrēnikita Deus wata, iwaze isoho humo tsinymyrykynaha. Kiristu humo

tsinymyrykynaha iwatsahi Deus humo niwatihi tsinymyrykynaha.

⁷ Katsaktsa Deus wasania ty tsiktsasoikiknaha. Deus pokzitsihity. Katsa mypunihikbyitsa tu Deus zikwy mytuk mynapykyryk, iwatsahi izikwy humo zuba wasania ty tsimynatsasoikiknaha. Katsaktsa morosuk watsa. Morosuk batu isapy batu ihudi iwatahi myboboro iwatatu amy ty ipokzitsiaty morosuk eze pok pok tsimaha. Deus iwatu nimysukni iwatahi kytsa myharere ty piwabykynahaze:

— O asaktsa batu sipunihik iwa motsasokonahaze Deus zikwy humo zuba hỹ — mykaranaha.

⁸ Kytsa mymyknikinahaze Sesus mymytsumuēhĩ. Paikpa mytsaty tsimykarannahaze Sesus humo tsimyspirikpokonaha.

⁹ Mysukyrytsitsa sizubarētsa. Myharerezi-uwytsa kino niwatihi sizubarētsa. Mysukyrytsitsa mymysukyryikiknaha iwatsatu Deus ba zikmyrek.

¹⁰ Pibiyituhukutu mysukyrytsitsa mymyba tsihikiknaha iwaze katsaktsa:

— Sesus sukyrytsitsa zibezena anawahi mymybanaha — tsimaha. Sesus izikwy hi mytuk mynapykyk ana kino kytsa sizubarētsa mymysatykynaha.

¹¹ Kytsa Sesus harere bo batu hỹ mykaranaha asaktsa mymyba tsihikiknahaze Deus mype:

— Ahasukyrytsitsa pahamyitsapyriwykynaha zeka kahyrikoso ahatuk mynapykyryk ihumo ahapunihikrētsa tsimoziknaha — niy. Iwatsahi kytsa sizubarētsa hi:

— O asaktsa Deus zikwyo humo zuba sipunihikrētsa, ihyrikoso situk mynapykyryk — mykaranaha.

¹² Sesus Kiristu harere tsimytsasokonahaze asaktsa Sesus harere bo yh̄y ahabyitsa tu mymyba tsihikiknaha. Ikiahatsa myharere bo yh̄y tsimykaranaha h̄y iwaze tsimyhyrikosokdanaha zeka Deus tuk ahawahi tsinapykyknaha. Katsa sinini tsimykaranaha iwatsahi ikiahatsa Deus tuk ahawahi tsinapykyryknaha.

¹³ Tubabatu Deus harere papeu humo ziwataha:

— Deus harere humo hȳy ikykara iwatahi iharere soho iktsasoko — niy. Katsa niwatihi Deus harere bo hȳy tsimykaranaha iwatsahi iharere kytsa bo tsimytsasokonaha. ¹⁴ Sesus Kiristu nihyrikosokdaze Deus hi zihyryzikpowy. Katsa niwatihi tsimyhyrikosokdanaha zeka Deus mynamyhyryzikpowy Kiristu wata. Katsaktsa ituk mywahi tsimynapykyknaha. Ikiahatsa kino niwatihi ituk ahawahi tsimynapykyknaha. Deus bo mymyoktyhyryk anaeze mywahi tsimynapykyknaha h̄y. Ana humo hi myhyrinymyrētsa tuze Deus wasania ty tsimytsasoikiknaha.

¹⁵ Katsaktsa Deus harere ahabo tsiktsasokonahaze sinini tsikykaranaha. Ana bo hi iktsa tsikykaranaha. Iwatsahi Deus pahasapywyky iwatsahi sizubarētsa ahatuk Deus tyryktsa moziknaha. Iwaze kytsa sizubarētsa Deus bo nipamykysokonaha:

— O Deus myzo ikia zuba amysapyrēnikita. Mybo tsipisapywyky iwatsahi katsaktsa ahumo ka mykurētsa — tsimykaranaha. Iwaze

kytsa sizubarētsa Deus zuba imysapyrēnikita sihyrinymyrētsa hỹ.

Sesus humo sispirikporētsa.

¹⁶ Iwatsahi batu mysukatsihik. Mynury humo batu mypaik tsimytsaikbanaha katsaktsa mypunihikrētsa tsimoziknaha hỹ. Deus hyrikoso mytukze iwaze Sesus harere humo zuba tsimyspirikpokonaha. Myzibytuhukutu izikwy humo meky watu tsimoziknaha.

¹⁷ Asaktsa Sesus harere bo yhỹ ahabyitsa mymyknikinaha. Pahamyitsapyriwykynaha aibani simysapybyitsa tu nikaranaha nepyknaaha. Ana humo hi sininispyk tynakaranaha. Bykzehu Deus mybo pisapywyky. Katsaktsa iwa tsimoziknaha mysapyrētsa hỹ. Niwazubaktsa! Ana kino tawahi tsimynapykyknaha hỹ.

¹⁸ Iwatsahi hawa ha ty iktsaziu tsimykaranaaha ana soho bo mytsaty mytsaty byitaha. Aibani mynapyk mopyk naha bo ka mytsaty mytsaty byitaha. Zikozonahabara bo hi mytsaty tsimykaranaaha. Hawa Deus tuk mywahi tsimynapykyryknaha ana soho humo hi mytsaty tsimykaranaaha. Amy bo iktsa tsimykaranaaha bykyze hana bo ja. Amy bo batu iktsa tsimaha atsatu tawahi mynapykyk. Iwa hỹ.

5

¹ Mynury myparik waha. Kaparik eze mopykyrykspek bykyze mopykbaik iwahatu aba zuba atatu tsimaha, bykyze tsimyhyrikosokdanahaze mynury mobibiba. Tsimyhyrikosokdanahaze mynury wytyk eze tu motare. Deus hi ustsā nury

ezytyk mysisukni mytsyhyryze pikymy. Bijoikpe eze mynury ezytyk mozokni anaka mywahoro waha tahawahi mynapykyknaha.

² Abaka mynury ezytyk humo botu myhyrizik-barētsa. Iwatsahi mynury bijoikpe eze tu taperyky. Ana hi tsimyzihikiknaha. ³ Anaeze bijoikpe eze tu mysuk wa tsimynapykyknaha. Mynury ezytyk mysuk wata maha. ⁴ Katsaktsa mybarawy ezektsa sinini tsimykaranaha. Mytsapyrētsa tsimaha. Kytsa tahaparik eze tu watsa, katsaktsa mynury eze tu tsimaha. Myhyrikosokdabyize mynury ezytyk zuba tsimyzihikiknaha hỹ. Deus mynury ezytyk ty mybo nyny myze mywahi ituk tsimynapykyknaha, ba zikyrikosokdazonaha iwa tsimyzurukunaha.

⁵ Deus hi mekywaha botu mymysapy naha humo hi nimysukni, ihyrikoso mytuk mynapykyryk ana kino mozihikik. Iwaze Deus usa nury ezytyk myhumo mokymy mytuk mynapykyryk ana hi tsipinymyryknaha.

⁶ Iwatsahi mypunihikrētsa. Mybarawy eze tuze mynury tuk mypehatsa metutu tsimaha. Aibani zuba mywahi ituk tsinapykyryknaha ana humo hi mykurētsa.

⁷ Iharere bo hỹ tsimykaranaha iwatsahi ana hi taperyky. Ana humo hi batu iktsa tsimaha iharere bo hỹ tsimykaranaha zuba. Sesus sopyk ty tsimyzurukunaha iwatsahi ihumo myspirikorētsa tsimoziknaha. ⁸ Iwatsahi mykurētsa. Hawa ituk mywahi tsinapykyknaha mytsaty tsimykaranahaze hi mykurētsa. Iwatsahi mynury tahaerek tsihikik. ⁹ Amy ty aba zuba Sesus myhumo tsakurēta mozik.

Katsaktsa mynury suk eze tu myhumo tsakurēta tsimyzihihiknaha. Katsaktsa ituk mywahi tsinapykyknahaze myhumo tsakurēta mozik, iwa tsimyzihihiknaha.

¹⁰ Myzubarētsa Kiristu okeryk tsinamykahanaha. Hawa tsikykaranaha humo motsaso. Kiristu simysapyrētsa pe my: — Ikiahatsa mybarawy eze tuze tsikzisapykynaha hỹ. Iwaze isapyrēnikia ty ahahuak ty ahabo nyny — my. Kyze simysapybyitsa pe:

— Ikiahatsa mybarawy eze tuze ahamysapybyitsa tsikykaranaha. Iwa imysapybyiha ty ahabo ahahuak ty nyny my pahasininiwyky — my. Iwa hỹ.

Hawa Deus harereziuwytša tsimoziknaha.

¹¹ Kyze mypehatsa Sesus Kiristu tsazuba nakarata humo myhyrinymyrētsa, ihumo ma tsimykaranaha zuba, ipokzi batu mysukatsihik. Atahi myhuak ty mybo nyny my mytsaty tsimykaranaha. Iwahatu itsyhyryze tarabajaziu tsimykaranaha. Deus wasania ty Sesus soho tsimytsasokonaha iwaze kytsa iharere bo hỹ mykaranaha. Tsimytsasokonahaze wasape mysopyk, wasaniha zuba kytsa mysihyrinymyrykynaha, Deus ana humo kino zinymyry. Ikiahatsa myhumo tsinymyrybabanaha. ¹² Ikiahatsa mysoho humo batu mymybetesazo. Ahape batu tysozo. — Katsa tsipahasapywykynaha iwatsahi mybo hỹ tsimykaranahaktsa! — my. Iwa batu tyso. Ikiahatsa myhumo ahakurētsa ana hi tsimyzihihiknaha. Wastuhu kytsa ahabo

zumunaha asaktsa mymysapybyrikinahatsitsa. Siokzeka simysapyrētsa watsa maha amy ty ape bo zuba iktsa sisopyk. Asaktsa mektsatu maha batu sisopyksapy. Hawa tsimyzurukunaha wasani my, ana soho humo hi tsimymybetesanaha.

¹³ Tozeka ja katsaktsa ahaokze ka mytyrykmyitsa watsa. Katsaktsa Sesus pokzi tarabajaziu tsikykaranaha ana humo hi ahaokze ka mytyrykmyitsa mytsaty tsimykaranaha. Zimyinahabyitsa tu zeka tsipahatsumuēhīnaha ana humo hi tsimyzurukunaha ana kino tsipinymyrykynaha iwaze ahatsyhyryze tarabajaziu tsimykaranaha. ¹⁴ Kiristu myhumo tsimypokzitsiarēta. Anaty kino kytsa sizubarētsa tysitsumuēhīnaha. Mytsatyziu tsimaha

zeka maku estuba zuba mybarawy Ezektsa sapyzekenihyrikosokda. Iwatsahi mybarawy Ezektsa Sesus tuk tsimyhyrikosokdanaha. ¹⁵ Mysapyzekenihyrikosokda iwatsahi hawa ha tsimyzihikiknaha batu hỹ tsimykaranahaze. Niwazuba mysapyzekenihyrikosokda iwatsahi ana hi mozhikik ana bo hi hỹ tsimykaranaha. Atahi mysapyzekenihyrikosokda iwatsahi ana hi mozhikik ana bo hi hỹ tsimykaranaha iwa tsimyzurukunaha.

¹⁶ Abaka mybarawy Ezektsa watsa batu mytsaty tsimykaranaha. Mypetu mysopyk:

— O atakta tsimysapyrēta wata — tsimaha.

— O ustakta imysapybyita wata my — iwa mytsaty byitaha! Tapara Kiristu soho nawa mytsaty tsikykaranaha abaka batu. Tsiziakbatanaha zuba zeka Kiristu mymyhyrinymyryky. Sesus Kiristu

humo myspirikporētsa tuze kytsa ezytyk watsa tsimoziknaha.

¹⁷ Kiristu tuk tsinapykyknahaze meky watu tsimoziknaha. Deus mymysuknizo tawa iwatsahi ihumo meky watu tsimoziknaha. Hawa tapara tsikzurukunaha batu imysapy abaka mahani. Iwaha hi nepykbaik katsa meky watu tsimoziknaha. ¹⁸ Iwatsahi meky watu tsikyziknaha. Deus humo zuba katsa meky watu tsimoziknaha, Deus hi nimysuknizo Kiristu mysapyzekenihyrikosokda naha humo katsakta meky watu tsimoziknaha. Tubabatu katsakta Deus humo batu mykparawy taparaka ihumo tsikmykyrikinaha. Abaka mahani. Ata humo hi abaka ahaharereziuwu tsimoziknaha iwaze Deus mype niy:

— Utsa kytsa boktsa! — tsimaha. — Kytsa bo tsimytsasonaha kahumo hi kaharereziuwu moziknaha, ahaokani byihuja tsimaha — Deus niy.

¹⁹ Kytsa sizubarētsa simysapybyitsa ty nikaranaha ana soho Deus bo ka batu mytsaty nikara. Kytsa simysapybyitsa ty nikaranaha Kiristu sisapyzekenihyrikosokda. Kiristu nihyrikosokdaze simysapybyitsa tu nikaranaha sihuak ziaксе. Iwatsahi ispe tsimaha:

— Sesus harere humo hyỹ tsimykaranaha zeka Deus harereziuwu tsimoziknaha. Kiristu ahasapyzekenihyrikosokda iwaze Deus ahamysapybyitsa tsikykaranaha ihumo zahaokzo — tsimaha. Sesus Kiristu mypehakatsa, iwatsahi iharere kytsa bo tsimytsasonaha.

²⁰ Iwatsahi Deus ykzohotsa tsimaha. Deus harere zuba ahabo tsimytsasonaha. Katsa hi:

— Deus harereziuwytša tšimoziknaha ana hi mozihičik. Deus myzo ahasopyktsa — tšimaha. Deus hi mybarawy eze tu zeka atsatu ahabo mot-sasoko, katsaktsa iakzohotsa tšimaha.

²¹ Kiristu batu imyi ana humo hi ahahyrinymyrētsa. Katsa mysapybara ty ana hi Kiristu ziačsehyryk niy. Nihyrikosokdaze mysapybara huak ty ziačse niy. Iwaze mysapybytsa ty tsikykaranaha Deus mymyokzohik abaka hana bo ja. Iwatsahi katsaktsa Kiristu tuk tšimyzurukunaha zeka isopyk watu tšimykaranaha iwatsahi Deus okzeka mysapyrētsa tšimoziknaha. Katsa meky watu tšimoziknaha. Iwa hỹ.

6

¹ Kyze katsaktsa Deus tuk tarabajaziu tšimykaranaha iwaze mypehawy hi:

— Tapara Deus zahasapywyky, isapyrēnikia ty ahabo nyny niy ana humo kino ahaspiriktsok-daha byihuja! Deus harere bo hyỹ tahaktsa iwatsahi isapyrēnikia ty arek arek byitaha ja! — tsikaha. ² Deus harere tšiwabytoktonaha! Deus hi:

— Zahasapywy tšihikikze amy kabo tsikzapykykynaha botu iwaby.

Ikiachatsa kabo ahasapybytsa tsikykaranaha katse humo pahaokzohik.

Iwa zahatsumuēhĩ tšihikik — niy. Abaka Deus pahasapywy tšihikik, abaka pahatsumuēhĩ tšihikik.

³ Wasani tsimyzurukunaha iwatsahi kytsa Sesus harere bo hȳ mozihihiknaha. Hawa batu imysapy tsimykaranaha zeka kytsa tihi:

— O Deus tsumuēhītsitsa batu wasani mykaranaha iwatsahi katsaktsa Sesus harere bo batu h̄y zikaha — mykaranaha. Nawa kytsa mysoho ba ziktsasonaha, batu zikaha, wasani tsimykaranaha.

⁴ Katsa hi Deus tsumuēhītsitsa tsimaha, ana kino ustsā bo tawatawykynaha. Asaktsa Sesus harere bo hȳ ahabyitsa tu mymyknikinaha. Katsaktsa sihumo mykubyrisorokrētsa. Mymysukyryikiknaha, mykubyryitywy kino niwatihi iwatsa tu mykubyrisorokrētsa.

⁵ Asahi nimykinaha nymyhuruknaha. Katsa tsiknazuzuknahaze nymysapybyrikinaha. Nymyhudizukunaha. Deus humo tsizubarēna ty tarabaja ba zikpyk, myrapa tsiykyknaha, mytutsa tsiykyknaha iwa tsikzurukunaha.

⁶ Iwaze ustsā kytsa mysoho zinymyrykynaha. Katsaktsa Deus tsumuēhītsitsa sihyrinymyrētsa. Wasani tsimyzurukunaha ana humo hi katsa Deus tsumuēhītsa zinymyrykynaha. Mysapyrētsa. Deus harere humo myhyrinymyrētsa iwatsahi iharere tsimytsasoziukunaha. Mykubyrisorokrētsa. Mysopykziurētsa. Deus hyrikoso mytuk mynapykyryk iwatsahi kytsa tsiksisapywykynaha. Tsiksipehapokzitsikinaha.

⁷ Deus harere zuba tsimytsasoziukunaha, Deus zikwy mytuk mynapykyryk. Wasani tsimyzurukunahatsa hi ana humo mybototsa watsa tsimaha. Mybototsa ty papyk papyk tsimaha mymybetesawy naha ziktsa watsa

namybetesakanaha. Kytsa Sesus bo hyñ ahabyitsa tu myhumo natahakyrikinaha. Mysapyrētsa tu Deus hyrikoso humo iwaze batu myharerewabymybara batu zikaha. ⁸ Wastuhu kytsa mysoho humo siharereziurētsa. Utsaktsa batu, mysoho humo batu siharereziu mymysapybyrikinaha. Mektsatu kytsa tihi:

— O Pauro tuktsa simysapyrētsa — maha. Utsa:

— O Pauro tuktsa batu mykparawy — maha. Iwa my. Katsaktsa wasani tsimykarannahaze batu isty myi, amy ty wasanikia ty zuba tsimytsasokonaha. Iwaze kytsa mysoho — asaktsa sispihikbatakatsa — maha. ⁹ Kytsa nyhybyitsa watsa sisopyk. Utsaktsa mynyhytsa tihi hñ maha. Wastuhu kytsa:

— Pauro tuktsa botu niakbabanaha — maha. Katsaktsa myspitu tsimaha. Kytsa mymyzuhunahaze ba zikmybanaha.

¹⁰ Kytsa ziknamykubyikinaha iwatsatu Deus humo mykurētsa tsimynapykyknaha. Kytsa tihi — asaktsa sinamybyitsa — maha. Katsaktsa Deus wasania ty tsimytsasokonahaze isapyrēnikia ty kytsa bo nyny tsimykarannaha, ikiahatsa niwathiktsa ana harere humo hi sinamyrētsa watsa moziknaha. Kytsa okzeka mynamybyitsa watsa iwatsatu Deus okze mynamyrētsa watsa imysapyrēnikia ty mybo nyny niy.

¹¹ — O Korītio ezektsa myharereziuwysitsa ahahumo tsimypokzitsiukrētsa. Myharere ahabo batu iokdaha myharere mypubara. Hawa mytsaty tsimykarannaha ana kino ahabo tsimytsasokonaha ikiahatsa mykparawytsa.

12 Tsipahasapywykynaha ana hi tsimyzi-hikiknaha. Ikiahatsa ja. Myhumo hỹbyri tsimykaranaha. 13 Ahabo tsimytsasokonahaze myhyrytsa pe maha wa tsinakaranaha. Ikiahatsa mybo aha humo kyty tsiwatawynaha. Myhumo ahakyribyihu ja — tsimaha.

Pauro Korītio ezektsa bo nisisukpe.

14 Ikiahatsa kytsa Sesus harere bo hỹ ahabyitsa tu ka pāo pāo byitaha. Kytsa simysapybyitsa mykaranahatsa ba situk mynapykyknaha. Aty zeka okoroze pitabaka taske humo tsihyrinymyrēta. Aty zeka unata eze pitabaka pyrik pyrik mykara iwatsahi ituktsa batu zikaha. Asaktsa ahatuktsabyitsa. Iwatatu ikiahatsa Sesus tuktsa Sesus harere bo hỹ zikahabyitsa tu ba situk tsinapykyryknaha. Batu ahamykpyriziu.

15 Kiristu Satanas ahatsa batu harape tuk zikaha. Iwatsa Sesus tuktsa Satanas tuktsa meky watu maha. Hawa Sesus tuktsa mytsaty mykaranaha hawa Satanas tuktsa mytsaty mykaranaha meky watu mykaranaha. Batu atsatu mytsaty zikaha. Iwatsahi batu simykyriziu. Iwa hỹ. 16 Deus wahoro zubata deusbyitsa wahoro mekywaha tu maha. Katsaktsa Sesus harere bo hỹ tsimykaranahaze Deus wahoro wata tsimaha. Deus hyrikoso mytuk mynapykyryk iwaze Deus hi:

— Utakta situk mynapykyryk. Kape: “O Deus ikia zuba myzo” maha.

Ikiahatsa hi katyryktsa ispe my — niy.

17 Iwatsahi mypehatsa tihi niy:

— Sispirikpobyitsa ty ka arekiktahaktsa!

Hawa mysopyksapy byizeka tahaerekiknahaktsa!
Imysapybara tsiperekiknaha zeka kabo pahaoktyhyryk hỹ.

¹⁸Utahi ahazo mozik.

Ikiahatsa kahyrytsa tsimoziknaha.

Kahyrytsa kahyryza ahape my — niy.

Iwa Deus nikara atahi izikwyrēnikita my ba hawa tohi zikzukninaha.

7

¹ — O myharereziuwytša ahahumo kamypokzitsiarēta. Deus mymysapywyky isapyrēnikia mybo pinyny tsihikik my ana tyhi Deus mybo motasoko. Iwatsahi hawa ha ty mysapybyitša tsimykaranaha ty ka tymoewytahaktsa! Isopyksapybara humo mytsaty mytsaty byitaha! Iwa tsimykaranaha zeka Deus hi mysapyrētsa mymysukni. Iwaze hawa ha ty Deus batu iakparawy ipokzi batu tsimykaranaha. Iwaze isoho zuba mytsaty tsimykaranaha — my.

Pauro tsakurēta mopykyryk.

² O kytsa myhumo ahamypokzitsihuktsa! Katsaktsa tsipahapokzitsikinaha hỹ. Katsaktsa batu aty tohi tymyi. Katsaktsa batu aty tohi humo myharerewabytsihik. Katsaktsa ahatukze batu mybarapetu aha. Mynamy humo zuba batu mybarapetu tsikykaranaha, aha humo wasani mysopyk.

³ Ana tyhi batu tyso iwaha ty ahamysapybyi humo. — O ikiahatsa kaokzeka batu ahamysapy — my. Ana ty hi batu mysopyk. Botu ahabo iksaso hawa ahahumo mypokzitsirētsa, mywahi ahahumo mypokzitsirētsa

tsimaha. Abaka ahahumo mypokzitsirētsa, tsimhyrikosokdanahaze kino iwa hỹ ahahumo mypokzitsirētsa. ⁴ Utakta ahahumo kakurēta myspihikbatabyitsa tu tsimaha. Utsa kytsa bo pahaharereziuwky. Kytsa mymysininiwykynahaze ahasoho bo mytsaty tsimykaranaha, iwaze tsimyziakuwynaha. Ahahumo hi kakurēta.

⁵ Masedonia bo tsikzumunahaze batu myty byry. Kytsa sizubarētsa nahape myjakanaha ana soho meky watu tsihokdaharēna. Mypybyrētsa tsikykaranaha. ⁶ Deus siakubyitsa mysiakuwyky mozihikik iwa mybo niy. Titu zumuze Deus ihumo mymykuwyky. ⁷ Zumuze atahi:

— O Korītio ezektsa kahumo simypokz-itsiukrētsa hỹ. “O Pauro humo katsa myhyrizikbarētsa mybo mynakozore tawata” nikaranaha. Atakta imysapybara ty nikara, isoho humo batu siaku, ihumo sisukatsihikrētsa mykaranaha “O Pauro pehawy wasani” nikaranaha — niy. Iwa Titu mybo nipamykysoko. Hawa Korītio ezektsa pikbetesa tsihikiknaha iwatahi kakurēta babata mopykyryk. Iwa Deus nimykuwyky.

⁸ Iwaze kapapeu humo zahabetsakak ahaku by-itsa tu tsikyppykyknahatsa tu iwaze ahasukatsihikrētsa tsikaha. Ana kino ziwatahaka wasani niy. Kapapeu humo batu ahaku wasani niy. Tapara kapetu ikykara:

— Anapapeu iwatahaka Korītio ezektsa iksibetsakak wasani ja — iwa kapetu kasopyk.

⁹ Kawatahaha humo ahasukatsihikrētsa ana

humo hi wasani my. Kawatahaha tsinymyry-nahaze ahamysapybyitsa tsikykaranaha tsimoewy tsihikiknaha ana humo hi kakurēta. Deus hi zahaokzohik ahamysapybyitsa tsikykaranaha humo batu ahaku tsikyziknaha abaka ahamysapybyitsa tsimykaranaha. Tsimoewybaiknaha. Iwatahi kawatahaha ty ahabo ikzinynyre wasani, abaka kaharere humo batu ahamyi iwatahi ahasapywyky.

¹⁰ Jokboha ahakubyitsa tu tsikykaranaha iwatsahi mysapybyitsa tsikykaranaha tamoewybaik, iwaze Deus zikwy humo meky watu tsimoziknaha. Ahasapyrētsa tsimoziknaha. Ahakurētsa. Asaktsa Deus humo batu siakparawy asahi pisuka tsihiknaha zeka simysapybyitsa nikaranaha ba ziksimoewynaha. Myhyrikosokdanahaze Deus tuk ba tahawahi ziknapykyryknaha asaktsa sinini ykarawy bo maha. ¹¹ Ahasukatsihikrētsa tsikykaranaha. Ahakubyrize Deus isapyrēnikia ty ahabo nyny niy. Ana bohi mytsaty tahaktsa kytsa! Iwatsahi kytsa wasani tsimoziknaha. Mybo batu ahaharere ty harapubetehe tsikykaranaha. Kawatahaha humo nepykba tsinymyrykynahaze tsikpybynaha! Atakta ahatuk imysapybyita tu nikara ihumo tsikahakyrikinaha iwaze ikiahatsa ipe: nabo pāoty tsikaha. Iwaze ahatuk zuba tsikpamykysokonaha:

— Hawa ja tsikykaranaha wasani ja. Tybyi zuba tsimaha ja. Pauro mytuk tsimyzihihiknaha iwa mymytsumuēhĩ — tsimykaranaha. Hawa tsikykaranaha wasani. Kytsa sizubarētsa ahasoho humo sispirikporētsa maha nikaranaha.

12 Iwatahi tubabatu ahabo iwatahaka. Atakta ahatuk imysapybyita tu nikara awatu mahakta iwa ahabo ity wataha. Atakta sinini niyze zikyrinomyryky ana humo hi ahabo batu ity wataha. Deus okzeka kaharere bo hyÿ tsimykaranaha, kytsa bo mypubara ty mykaranaha ana hi iwatahaka hawa myhumo ahamypokzitsirētsa, ana humo hi ahabo iwatahaka ana hi tsinymyrynaha. 13 Iwatsahi katsa mykurētsa hÿ.

Abaka myhyrinomyrētsa. Ikiatsa myhumo tsimypokzitsirētsa ana hi tsinymyrykynaha. Titu mybo zumuze atahi:

— O Korītio ezektsa zikpokzitsikinaha — niy. Wasaniha humo mykurētsa. 14 Tubabatu Titu ahabo asiba niparakze uta ipe iky:

— O Korītio ezektsa simysapyrētsa ahumo wasani maha papokzitsikinaha hÿ — iky. Kaharere wasani my. Ihumo tsimypokzitsikinaha ahasoho pe batu mybarapetu ikykara. Iwa ha ty wasani tsikykaranaha. 15 Titu hi:

— O Korītio ezektsa kaharere bo hyÿ nikaranaha. Ziksumuēhīkīnaha kahumo simyharerewabyrētsa — niy. Iwatahi ahahumo tsimypokzitsiarēta. 16 — O kytsa ahahumo kakurēta hÿ, hawa tsimytsasokonaha atsatu tsimykaranaha iwaze ahahumo kakurēta hÿ — my.

8

Sesus tuktsa simykubyihurētsa niyziknaha.

¹ O katukytsa Masedonia ezektsa asaktsa izumubanahaze Deus harere piwabynaha Deus nisapywyky iwatsahi simykubiyhurētsa niyziknaha, ana soho hi tsinymryrynahaktsa. ² Sinini nikaranaha. Sinamybyitsa nikaranaha. Iwatsatu ustsā sinamybyitsa bo nynytohi nikaranaha. Sibonyny nikaranahaze sakurētsa. ³ Ana humo hi kahyrinymyrēta. Ustsā kytsa bo zibiakaknaha. Uta batu isty peha nyny mykaranaha asa tu nyny nikaranaha. ⁴ Asahi:

— O mynamy ty myokyrysaro ty iwa ahabonyny tsimykaranaha. Sudeja ezektsa Sesus harere bo hȳ mykaranaha asa bo hi nyny tsimykaranaha. Myokyrysaro ty mytsyhyryzewabehyryk tsimaha — nikaranaha. Iwa tsizubarēna nitsasokonaha. ⁵ Katsaktsa mypetumysopyk:

— O asaktsa tsikaeni zuba nyny mykaranaha — mytsaty ahabyitsa tsikykaranaha. Tsizubarēna nyny nikaranaha. Taparaka tawaha ty Deus bo nyny niaha iharere bo zuba hȳ nizihikiknaha, iwaze myharere bo kino niwatihi hȳ nikaranaha. ⁶ Ana ty kino katsaktsa Titu pe:

— O Korītio bo tynakozorekta — tsikaha. Titu zahatsumuēhī. Ahape niy:

— Ahaokyrysaro ty sinamybyitsa bo nyny tahaktsa! Iwa tsipisapywykynaha — niy. — Iwaze Korītio ezektsa bo tsimy. Tysiakuwykyktsa — iky. Hȳ niy.

⁷ Ikiyahatsa ahanamyrētsa watsa tsinakaranaha. Sesus humo ahaspirikporētsa h̄y. Deus wasania ty tsimytsasozuukunaha. Tsahyrinymyrētsa babatsa tsimaha. Ustsā tsimysitsumuēhīkīnaha

hỹ. Myhumo ahamypokzitsirētsa tsimaha. Iwaze uta ahape my: — Sinamybyitsa bo ahanamy ty nyny tahaktsa! Utsa kytsa sinamybyitsa bo nyny maha, ikiahatsa hi ahanamy tsizubarēna ty nyny tahaktsa kytsa sinamybyitsa bo! — my.

⁸ Ahabo motsasoko kahumo batu ahaty ykzo. Batu kaharere humo ahanamy ty nyny tsimaha. Masedonia ezektsa tsizubarēna ty nyny niaha. — Ikiahatsa tihi! — iwa tsimykarana zeka myhumo ahamypokzitsirētsa babatsa tsiwatawykynaha.

⁹ Ikiahatsa botu mypehakatsa Sesus Kiristu soho bo mytsatyziu tahaktsa! Myhumo tsimypokzitsiarēta hi atakta Deus tuk bijoikpe eze tuze tsinamyrēta hỹ. Iwatatuze mybarawy bo izumuze inamybyita niyzik mypokzihi ninamybyiri. Iwaze hi katsa ihumo mykurētsa tsimoziknaha, sinamyrētsa watsa.

¹⁰ Kapehawy ty ahabo my. Jatukta omoro eze ikiahatsa tihi:

— O sinamybyitsa tsyhyryze myokyrysaro tsiperykynahaktsa! — ahatuk tsikpamykysokona. Taparaka ikiahatsa tsikzihikiknaha iwaze atsatu tsikykarana Sudeja ezektsa tsiksitsumuēh̄naha. ¹¹ Iwatsahi tybyizubatahaktsa! Sinamybyitsa tsysitsumuēh̄zonahaktsa kytsa! Batu mytsaty tsimaha:

— O myokyrysaro ty tsizubarēna mozik zeka iwaze sinamybyitsa tsyhyryze taperyky — iwa ba mytsaty tsimaha. Abaka ahaokyrysaro ty tsimaha ana kino sinamybyitsa bo nyny tsimaha.

¹² Ahakurētsaktsa! Katsaktsa myokyrysaro ty nyny tsimyzihikiknaha zeka ana kino Deus okze

wasani my. Myokyryrsaro tsikaeni zuba tsimaha zeka iwaze ustsā bo tsipinynynaha zeka ana kino Deus okzeka wasani my. Iwatahi aty nyny myzeka Deus hȳ my. Mybaze byizeka Deus batu mype ziky:

— Ustsā bo tsipinyny tsihikiknaha zeka ana kino kaokze wasani — my.

¹³⁻¹⁴ Ahanamybyitsa tsimoziknaha zeka batu mozihikik. Abaka ikiahatsa ahanamy tsizubarēna tsikaha asaktsa batu sinamy. Iwatsahi ahanamy sibo tsibiaknaha zeka wasani. Bykyzehu tozeka ja ikiahatsa ahanamybyitsa tsimoziknaha iwaze ahabo pibiakaknaha. Iwaze batu aty tohi inamybyita. Batu aty tohi inamyrēta. Ikiahatsa aharape watu tsimoziknaha ahatuk tsipibiakaknaha. ¹⁵ Deus harere papeu humo iwataha:

— Aty disahawy tsizubarēna zeka ba are ziky.

Aty zeka disahawy jokboha zuba atakta batu irapa — niy.

Iwa Deus watahaha nitsaso kytsa soho asahi pibiakaknaha.

Titu iwaze ituktsa ahatsa hawa mykaranaha.

¹⁶ Iwaze Titu kawata my. Atahi niwatihi pahatsumuēhī tsihikik iwaze utakta Deus pe:

— O myzo ikia zuba amysapyrēnikita. Ikia humo Titu Korītiō ezektsa mysitsumuēhī tsihikik iwatahi kakurēta — mykara. ¹⁷ Titu kaharere bo piwabyziuku hawa ha ty ibo nizapykyky ana hi hȳ niy. Atahi:

— Utakta Korītiō ezektsa bo mynakozore tsihikik — niy. ¹⁸ Ituk hi usta mytuky tapehaka nanabyitaba. Deus wasania ty natsasokoro myzubaha bo. Sesus tuktsa sizubarētsa isoho tihi:

— O ata hi tsiwaby tsihikiknaha — maha.
 19 Sesus tuktsa mytukta tu ziwatawynaha, Serusarēhe bo tsikukurunahaze mytukta ziwatawynaha. Ahaokyrysaro ty wabehyryk tsimaha ana kino sinamybyitsa bo nyny tsimahaze:

— Katsa ahahumo mypokzitsirētsa — sihyrinymyrētsa. Asaktsa Deus pe niaha:

— O Deus myzo ikia zuba tsamysapyrēta — maha. Ahanamy ty sibo tsipibiakaknaha humo tynamypehapokzitsikinaha iwatsahi Deus bo inapamykysokonaha.

20 Okyrysaro tsizubarēna Serusarēhe ezektsa bo wabehyryk tsimaha. Hana wa sinamybyitsa bo okyrysaro ty nyny nyny tsimaha ana hi wasani tsimykaranaha, iwa zeka hawa okyrysaro ty kytsa bo nyny tsimaha pykyhytu tsimaha. 21 Hawa Deus okzeka wasaniha bo zuba mytsaty tsimyzi-hikiknaha. Deus okze ka wasani tsimykaranaha ikiahatsa okze kino niwatihi wasani tsimyzihihikiknaha.

22 Iwatsahi usta Sesus tukta katsy piakzohik. Tapara hawa tsihokdaharēna nikaraze kytsa nisitsumuēhīkī ana ty hi myhyrinymyrētsa. Ahahumo tispirikporēta iwaze tihi:

— O Korītio ezektsa okyrysaro ty sinamybyitsa bo nyny maha ana humo hi kahyrynymyrēta — mykara. Ahabo mynakozore tsihikik. Iwa hỹ. Kytsa harakykbyitsa ahabo mysiakzoko.

23 Titu katukta pahatsumuēhīkī. Utsa Sesus tuktsa petoktsa ituk mokurunaha. Sesus harere bo hỹ sisopyktsa asahi siwatawyhytsa niaha. Kiristu bo mosakibazikiknaha. 24 Kyze ahabo

mozumunahaze tysipokzitsikinahaktsa kytsa!
Iwatsahi Sesus tuktsa sizubarētsa Korītiō ezeaktsa
soho humo maha:

— O asaktsa kytsa humo mysipokzitsikinaha hỹ
— mykaranaha. Iwaze myharere ahasoho wasani
my sihyrinymyrētsa.

9

*Korītiō ezeaktsa siokyrysaro ty Sesus tuktsa
Sudeja ezeaktsa bo nyny niaha.*

¹ Iwaze asaktsa Sudeja ezeaktsa Deus tuktsa
tsimysitsumuēhĩ tsihikiknaha kahyrinymyrēta
iwatahi batu ahabo papeu humo piwataha.

² Utakta botu Masedonia ezeaktsa pe:

— Sesus tuktsa Keresia ezeaktsa sinamybyitsa bo
mysitsumuēhĩ tsihikiknaha jatukta niytyktseheze
nisitsumuēhĩ tsihikiknaha — iky. Ana hi ziwaby-
nahaze asahi:

— Katsaktsa niwatihi sinamybyitsa bo tahat-
sumuēhĩ tsihikiknaha — niaha. ³ Aba uta my-
tukytsa ahabo mysiakzoko. Ispe iky:

— O Korītiō ezeaktsa botu tahaokyrysaro
izikyppykyknaha. Ana hi mybo nyny
mahaze iwaze katsaktsa siokyrysaro tabykyk
sinamybyitsa bo nyny tsimaha — iky. Anawahi
iktsasoikik. Ahaokyrysaro ty koro ahabyizeka
kaharere ba wasani my, iwatahi katukytsa ahabo
mysiakzoko, iwaze hawa ahabo botu iktsaso
atsatu tsimykaranaha.

⁴ Masedonia ezeaktsa katuk maha zeka
ahaokyrysaro ty koro habysizeka ahahumo
mysikybyrētsa. Ikiahatsa kino niwatihi
ahaokyrysarobyi humo ahasikybyrētsa.

Kaharere ahasoho humo siokzeka batu wasani ana humo hi kasikpybyrēta. ⁵ Iwatahi katukytsa kaharaze mysiakzo. Pahatsumuēhīnaha. Hawa ahaokyrysaro ty koro tsimaha zeka pahatsumuēhīkīnaha. Hawa botu tsiktsasonaha anaharere bo yhỹ tsimaha ana kino pahatsumuēhīnaha. Bykyze mozumuze mokymyba iwaze ustsā kytsa tihi:

— O Korītiō ezektsa tahaokyrysaro ty nyny ni-aha. Ba ustsā harere humo nyny niaha. Asaktsa tahaokyrysaro ty pinyny tsihikiknaha hỹ — mykaranaha.

⁶ Aty jokboha zuba mysiparik zeka jokboha zuba mysizozik. Aty mysiparik tohi zeka sizubarēna mysizozik. Iwa hawa nyny tsimykarānaha wata atsatu my. Ana bo hi mytsatyiutahaktsa kytsa! ⁷ Aty tapetu isopyk zeka:

— Kaokyrysaro ty ustsā kytsa bo ba nyny ziky — my. Iwa zeka nyny byity. Usta ape my zeka: — Aokyrysaro ty kytsa bo nynyty — my. Iwa zeka nyny byity. Ikiahatsa ahaokyrysaro ty ustsā bo tsipinyny tsihikiknaha zeka iwaze ahaokyrysaro ty nyny ty. Ahakurētsa nyny tsimaha. Iwa nyny tsimykarānaha zeka Deus okzeka wasani tsimykarānaha. Deus ahahumo tsimypokzitsiarēta hỹ. ⁸ Deus hi isapyrēnikia ty ahabo nyny mykara. Deus tanamy ty tsizubarēna ahabo nyny my. Iwaze ikiahatsa hi ustsā kytsa bo ahanamy ty nyny tsimaha. Ahanamyrētsa ikiahatsahi:

— O mynamy ty tabiak tsihikiknaha — tsimykarānaha. Iwaze Deus humo ba ziknamybyi tsimaha. ⁹ Iwa Deus papeu humo ziwataha:

— Aty tsimysapyrēta tu zeka tanamy ty sinamyby-
itsa bo nyny mynakara.

Iwaze kytsa isoho “ataкта tsimykubiyhurēta”
mynakaranaha

iwa Deus harere papeu humo ziwatahaka.

¹⁰ Deus hi riktsa ty mybo nyny my. Riktsa
jokboha tsimysipariknahaze puētsik zuba
tsimysizoziknaha. Tsimysipariknahaze
sizubarētsa tsimysizoziknaha iwa Deus
mydisahawy ty mybo nyny mynakara. Nawa
Deus isapyrēnikia ty mybo nyny mykara. Anawahi
ahanamy ty tsizubarēna ustsа kytsa bo nyny
tsimaha. Deus humo tsizubarēna kytsa bo nyny
tsimaha! Iwaze ahahyryzikporētsa tsimoziknaha.

¹¹ Deus ahahumo tsimypokzitsiukrēta iwaze
ustsa kytsa bo ahanamy ty nyny tsimaha. Iwaze
sinamybyitsa Sudeja eze tihi:

— O myzo ikia zuba tsamysapyrēnikita, Korītio
ezektsa sinamy ty mytsyhyryze Pauro tuktsa bo
nyny niaha. Iwatsahi sihumo abo tsimysak-
ibazikiknaha — maha. ¹² Sinamybyitsa mysit-
sumuēhīnahaze sakurētsa moziknaha. Asaktsa
Deus bo mosakibazikiknaha. Asahi:

— O myzo ikia zuba amysakihikynikita tsimy —
mykaranaha. ¹³ Iwa tsimykaranahaze sinamyby-
itsa Deus pe:

— O myzo ikia zuba wasani tsimykara. Korītio
ezektsa ahumo ka batu sisorek. Asahi Kiristu
harere bo hȳ mynakaranaha. Kytsa sizubarētsa
mysisapywykynaha mybo kino niwatihi nyny
mykaranaha iwatsahi mykurētsa tsimozikzonaha
— mykaranaha. ¹⁴ Asa hi Deus bo ahatsyhyryze

napamykysokonaha, ahahumo simypokzitsirētsa. Asahi:

— O Deus myzo tsimysapywyikik. Korītio ezektsa batu sisorek mymypokzitsikinaha. Ikia sihumo tsimypokzitsiukrēta iwatsahi nimitysumuēhīkīnaha — maha.

¹⁵ Niwazuba! Deus myhumo tsimypokzitsiukrēta hỹ. Deus tse babata mybarawy bo zipaha. Atahi ipokzitsianikia waha iwatsahi mykurētsa hỹ. Katsa hi:

— O Deus myzo ikia zuba amysapyrēnikita — tsimykaranaha. Iwa tahaktsa kytsa!

10

Pauro Sesus Kiristu humo iakzohota kytsa mysipehaze pibetesaka.

¹ Uta Pauro kapehawy ahabo motsasokoro. Deus harere ty pahahyrinymyry, Kiristu wata kakubyrisorokrēta. Atakta kytsa nisihrinymyry uta iwata pahahyrinymyry batu kasakpare my. Ikiahatsa kasoho humo:

— O Pauro nokponi zeka mymybetsakak, ata hi mytuk tu zeka ba zikmybetsak ana pokso tsipybyrēta — tsikaha. ² Iwatahi ahabo pomo zeka ba zahabetsak. Tsipimyikinaha zeka pahabetsak. Asaktsa kasoho tihī:

— O Pauro mybarawy ezektsa harere bo zuba yhỹ nikara, iharere ka Deus harerebara — mybarapetu nikaranaha. Pykyhytuty asa bo pomo zeka mysibetsak. ³ Mybarawy eze tu tsimyzurukunahaze mybarawy ezektsa watsa batu kasopyk hawa meky watu mytsaty mykara.

⁴ Tsinaharapesukyrykynahaze katsaktsa mybetesawytša mybarawy ezektsa byitša. Deus hi katsaktsa mybetesawy, mybarawy betesawytšaktsa jokbohatsa tu Deus betesawy ka, aba zuba ba zihokyknaha. Ana hi Satanas zikwy atsoko pihokdawy. Kytsa nahapepehakanahatsa metutu nipaparabaiknaha siharere atsoko pihokdawy. Deus zikwy humo mytuku mynapykyryk, iwaze siharere atsoko pihokdawy. ⁵ Asaktsa nahapepehakanahatsa aba zubatsa nizihikiknaha — mypehawy zuba Deus soho wasani my — mybarapetu mykaranaha. Iwa kytsa mysimiwykynaha, kytsa Deus harere bo hỹ byi mykaranaha. Katsaktsa Deus zikwy mytuk zeka siharere mohokda. Iwaze kytsa sizubarētsa Sesus harere bo hyỹ mykaranaha ihumo sispirikporētsa moziknaha. ⁶ Aty pimiywyo zeka sinini my. Ikiahatsa Deus harere humo hyỹ tsimykaranaha ahatuk zeka estuba iharere bo hỹ habyi zeka atahi sinini my.

⁷ O kytsa wabyziutaha! Ikiahatsa mynury bo zuba iktsa ahasopyk. Aty ahape my zeka:

— Uta zuba Kiristu harere bo hyỹ mykara Pauro tuktsa ja batu kanyhỹ — my. Isoho bo mytsatzyiutaha! Katsaktsa Kiristu harere bo hyỹ tsimykaranaha iwata tsimaha. ⁸ Iwa tubabatu Deus zikpeha. Pahahyrinymyry naha humo zikpeha. Ana hi botu iktsasoko batu kasikpyby. Deus zikwatawy tahi pahatsumuēhĩkĩ. Iwaze kapehawy humo ahapunihikrētsa tsimoziknaha, Sesus harere humo ahaspirikporētsa tsimoziknaha iwatahi zikwatawy. Ba zahabetsak. Ba zahasukatsihik ana humo hi batu katy peha.

⁹ Ikiahatsa bo piwatahakaze papeu pokso ahapybyrētsa batu mozihihik. ¹⁰ Aty zeka:

— O Pauro mybo zikziwatahakaze ziubaraty papeu humo ziknamybetsakak. Mytuk zeka mekta tu isopyk niy. Atahi:

“O Pauro ipunihikbyita tu iharere ba ziwaby-naha. Motsasoikik hawa mybo motsaso wasani ja”. Batu amy tohi mykara tsimaha — niy. ¹¹ Atakta ana kino nitsasoko kaharere bo wabyziuty! — Ahabo tsimynakozorenahaze myharere papeu waha my. Hawa botu tsiwatahanaha at-satu motsasoko — my. Iwa hỹ.

¹² Wastuhu kytsa ahatuk:

— O katsaktsa mysapyrēnikitsa — mykaranaha. Katsaktsa siwatsa batu tyso. Ba sihyrinymyry. Simytsatyhybyritsa tu hawa wasani zuba mykaranaha mytsaty aha byitsa mykaranaha. Deus okzeka batu wasani zikaha. ¹³ Tsimytsasokonaha humo pykyhytu — katsa zuba myhyrinymyrētsa — batu tyso. — Deus hi botu ahabo nimypeha iwatsahi tsipahayrinymyrykynaha iharere bo hỹ tsimykaranaha ana humo zuba tsimytsasokonaha — nawa mysopyk. Batu mybarapetu tsimykaranaha.

¹⁴ Katsaktsa tapara ahabo tsikzumunaha. Deus wasaniha ahabo tsiktsasokonaha. Deus hi:

— O Korītio ezektsa bo taha — niy. Deus nimypehanahatsahi ahabo tsikzumunaha. ¹⁵ Bykyze ustsya kytsa ahabo izumunaha. Iwatsahi batu tyso:

— O katsa zuba Korītio ezektsa bo Sesus soho humo tsiksihyrinymyrykynaha — iwa

ba zikaha. Ikiahatsa Sesus harere bo hyỹ tsimykaranaha ana zuba tsimyzihihiknaha. Abahi tsipinymyrytohinaha iwatuze Deus harere humo zuba hyỹ tsimykaranaha, mypehatsa harere bo zuba yhỹ tsimaha. Ana bo mymypeha anabo hi zuba tsimykurunaha. ¹⁶ Deus wasania ty ahabo tsimytsasobanahaze nokponi tsimykurunaha. Sasabyitsa bo tsimytsasokonaha nanabyitaba sihudikhudikwy eze tsinakaranaha. Iwatsahi kytsa batu tyso:

— Pauro tuktsa tuk Deus wasaniha kytsa bo motsasokonaha. Kytsa Deus harere botu ziwabynaha, sibo hi motsasokonaha — iwa batu tyso. Anaharere humo hi batu zikaha.

¹⁷ Deus harere papeu humo ziwataha:

— Katsaktsa mysapyrētsa tsimaha zeka. Katsa kytsa pe: “O Deus myzo atahi zuba tsimysapyrēnikita iwata tahaktsa kytsa!” — tsimaha.

¹⁸ Katsaktsa mypetu mysopyk zeka:

— O myokzeka wasani tsimaha — iwa tsimykaranaha zeka batu aty tohi yhỹ mykaranaha. Deus zuba mype zeka:

— O ikiahatsa wasani tsimykaranaha — my. Iwaze zuba wasani tsimaha iharere hi tisapyrēna atahi mymybetesaka niy hỹ.

11

Pauro iwaze siakzohobyitsa simyspihikbatanikitsa tuk mykara.

¹ Kyze motsasokoro ityrykmyita wata. Kaharere pykyhytu tsiwabyziunahaktsa! Kahumo

ahakubyrisoroku ja. ² Deus ahahumo pahapokz-itsiki nahawa tihi. Uta kino niwatihi pahapokzitsiki iwata my. Abaka ahahumo kasukatsihikrēta. Atatsa ityrykduwyhybyitatsa tuze iharerewabyhy zuba iakparawy ustsā mykyryburuktsa batu iakparawy. Atatsa watatsa ikiahatsa Kiristu zuba ahakparawy, ikiahatsa tihi:

— O Kiristu zuba mykparawy. Ustsaktsa harerewabyhytsa batu mywabyhy — tsimaha. Iwa mozihikik. ³ Ahasoho humo kasukatsihikrēta kytsa ahabo mybarapetu mykaranaha. Siharere tsiwabzyiunaha zeka batu imysapy mytsaty tsimykaranaha. Iwatsahi Kiristu harere humo batu hỹ zikaha siharere humo tsimiywyknaha. Satanas Ewa zispihikbataka naha wa asaktsa ahabo mybarapetu mykaranaha. Siharere bo yhỹ tsimykaranaha zeka kasukatsihikrēta. ⁴ Aty ahabo mozumuze iharere ezytyk motsasoze ikiahatsa hi:

— O ahawaha batu mynyhy — tsimaha. Tapara Sesus babata soho ahabo tsiktsasotsasokonaha. Asaktsa batu. Sesus babata soho ahabo batu tysoho. Tapara Deus hyrikoso soho ahabo tsiktsasotsasokonaha. Asaktsa batu, Deus hyrikoso babata ahabo batu tysoho. Tapara Deus wasania ty zuba ahabo tsiktsasotsasokonaha. Asaktsa siharere bo zuba yhỹ tsimykaranaha, siharere humo ahakurētsa. Hawa ha ty mektsatu motsasonaha. Deus wasania ty batu tyso. Asa hi ahabo mybarapetu mykaranaha.

⁵ Asahi ahabo mybarapetu mykaranahaze sihumo ahaharerewabymybarētsa tsimoziknaha. Deus zikwatawy atahi tazikwy ty kabo

nyny niy pahamyiwybyiki iwatsahi kahumo ahamyharerewabyrētsa! ⁶ Utakta kaharere-hokzaharēta tu hawa ha ty iktsasoko wasani my. Utakta kahyrinymyrēta hỹ iwatsahi kytsa sizubarētsa kaharere humo yhỹ mykaranaha. Tsizubarēna ahabo ty iktsasoko ana humo hi ahahyrinymyrētsa.

⁷ Ikiahatsa bo ikzumuze Deus wasania ty iktsasoko iwaze ahaokyrysaro ty kabo batu nyny tsikaha. Ahatukze kanamy tsikaeni tsibik zuba iky, iwa humo hi zikzuruku iwatahi Deus isapyrēnikia ty iharere ahabo iktsasoko. Deus wasaniha humo ihuakbara ty ikykara. Hawa wasani ikykara. Ikiahatsa kaharere humo Deus tyryktsa tsikyzi knaha. ⁸ Deus wasania ty ahabo iktsasokoze ustsas Sesus tuktsa siokyrysaro ty kabo nyny nikaranaha. Sesus tuktsa ustsas hudikhudikwy ezektsa siokyrysaro ty kabo nyny nikaranaha. Ahatsyhyryze siokyrysaro iakse iwa Deus wasania ty ahabo iktsasoze iwaze ihuakbara ty iktsaso.

⁹ Utakta ahatuk zikzuruspykze batu aty tohi okyrysaro humo zikykubyikize batu ahatykda. Sesus tuktsa Masedonia ezektsa kabo izumunahaze tahanamy ty kabo nyny niaha. Ikzi-hikik naha ty kabo nyny niaha. Ahabo batu ihuak ty ahabo tysapykyk iky ahabo kabokta batu aha. ¹⁰ Deus wasania ty Keresia ezektsa bo motsasoko. Iharere baba wasani motsasoko, Kiristu harere kakparawy iwaze batu mybarapetu kasopyk. Kahyriziktsokzawy kytsa Deus wasaniha motsasoko batu pyk kasopyk, ana humo hi ihuakbara ty ikykara. Batu kytsa siokyrysaro ty kabo

nyny zikaha. Niwazuba! ¹¹ Ikiahatsa hi:

— O Pauro myhumo imypokzitsiubyita tu myokyrysaro ty batu ziaксе — tsimykaranaha. Niwazuba! Deus hi tsihyrinymyrēta, utakta ahahumo kamypokzitsiarēta ana humo kino tsihyrinymyrēta hỹ.

¹² Asaktsa simysapybyitsa hi:

— O katsaktsa Pauro tuktsa watsa tsimaha — mykaranaha. Batu ba. Utakta Deus harere wasania ty ihuakbara ty motsasoko. Asaktsa batu mekywatsa tu nikaranaha. Asahi ahaokyrysaro ziaксеkenaha iwatsahi batu mywa zikaha.

¹³ Asaktsa kytsa Kiristu humo sipe ahabyitsa maha. — Katsaktsa Kiristu ykzohotsa — mykaranahaze mybarapetu mykaranaha:

— O Deus wasaniha tsimytsasokonaha ana kino myhyriziktsokzawy — mykaranaha. Iwa mybarapetu mykaranaha. ¹⁴ Utakta kapetu kasopyk:

— Satanās myzihawatahakanahatsa watsa niyziknaha mysispihikbatakanaha. Hawa skaraba Korītio ezektsa siharere bo yhỹ mykaranaha — batu mykara. Nawa batu mytsaty mykara. Satanās hi karipu karipuwu wata niyzik iwaze kytsa bo mybarapetu mykara. Atahi bijoikpe iknykta Deus tsumuēhĩtsa wata mozik. Hawaha ta sa. Kytsa bo mybarapetu mykara ana humo hi mykara. ¹⁵ Iwatsahi sitsumuēhĩtsitsa kino niwatihi nisispihikbatakanahatsa:

— Katsaktsa mymysapyrētsa — mybarapetu mykaranaha. Iwa kytsa mysispihikbatakanaha. Anasoho humo hi batu mypyby. Deus zuba moko-zoko hawa isapybara ty sibo nyny my.

Pauro iakzohota Kiristu humo izuhuta nikara.

¹⁶ O kytsa ikiahatsa ba kape:

— Pauro ityrykmyita ana bo ka — mytsaty mytsaty byitaha. Ikiahatsa ahaokze ka ityrykmyita mytsaty tsimykaranaha zeka kasoho bo zuba tsipiwabynaha. Sispihikbatakanahatsa watsa — kamysapyrēta — mykara.

¹⁷ Hawa ahabo motsasokoro kaharere ty zuba motsasoko. Deus mozihikik naha humo ahabo batu motsaso hawa mozihikik naha humo zuba ahabo motsasoko, ityrykmyita tawata motsasoko.

¹⁸ Utsa kytsa botu ahape mykaranaha:

— O katsaktsa mysapyrētsa — niaha. Ana hi nitsasokonahaze sihumo ahamyharerewabyrētsa ana hi nizihikiknaha. Siwatsa uta kino niwatihi — Kamysapyrēta — my. ¹⁹ Ahape tu ahasopyk:

— Katsaktsa myhyrinymyrētsa hỹ — tsimykaranaha. Ikiahatsa sityrykmyitsa harere ahakparawy. ²⁰ Asaktsa pahakyzonahaze sihumo ahakparawy. Pahaspihikbatakanahaze sihumo ahakparawy. Ahadisahawy piaksekenahaze ahakparawy. Sihumo ahanamybyitsa tu tsinakaranaha. Pahakikinahaze sihumo ahakparawy ahaspirikpobyitsa tu tsimykaranaha.

²¹ Katsaktsa sisopyk humo mysikpybyrētsa tsimykaranaha.

Wastuhu kytsa:

— O mysapyrētsa hỹ —. Utakta iwa niwatihi — O kamysapyrēta my — ityrykmyita wata motsasoko mybarawy ezektsa soho waha natasokonaha. ²² Asa tihi:

— Katsaktsa Ebereutsa — mykaranaha. Uta kino niwatihi Ebereu tihi. — Katsaktsa Isareu

ezeaktsa — mykaranaha. Uta kino niwatihi Is-areu ezeakta tihi. — Katsaktsa Abarão tsekokatsa — maha. Uta kino niwatihi Abarão tsekoka tihi my. ²³ — Katsaktsa Kiristu tsumuēhītsa — mykaranaha. Uta kino niwatihi, Kiristu harere bo hyỹ mynakara ana soho motsasoko zeka katyryk-myita wata my. Kiristu humo tarabaja abazuba ikykara itsumuēhīkī hỹ. Ihumo sakyriukrēnikitsa hurukwy bo kytsa zikoktyhyryknaha. Asaktsa batu sakyriukrēnikitsa hurukwy bo batu isty okty. Kytsa zikikinaha myraratsa hwyk ty tsizerēna ty zikikinaha. Asaktsa batu skiok. Kytsa asiba zikbezenaha zikikinaha. Asaktsa batu isty ba.

²⁴ Taparaktsa Sudeutsa zikihikiknaha. Mytsyhyry wa zikikinaha. Kasukpetara baze zikikinaha. Tirīta nowe zikikinaha. ²⁵ Homa ezeaktsa kino niwatihi zikikinaha. Harakykbyi kasukpetara baze hwi ty zikikinaha. Asaktsa siakyriukrēnikitsa harahare ezeaktsa ty zikarawowokonaha. Zikbeze tsihikiknaha iwa nikaranaha. Harakykbyi buburu zuba buruk ikukuruze tsaraha puētsikbyita niharazuk. Estubaka buburu zuba buruk unata iknatsutsuku okoroze iwa pihik eze ikapykyryk nimyra bo batu zuk.

²⁶ Nanabyitaba ziknaukuruze kytsa asiba zikbezenaha. Buburu inapokze. Sitsyhyryboarētsa kanamy ziaksebaiknaha. Sudeutsa taparaktsa kasukyrytsitsa zik-bezekyzykynaha. Sudeutsabyitsa kino niwatihi zikbezekyzykynaha. Sihudikhudikwy burukze kytsa zikbeze kyzykynaha. Jerukbara bo niwatihi kytsa zikbezekyzykynaha. Buburu zuba bo asiba ikarazuk. Kytsa tihi:

— Katsaktsa aharereziuwu tsimaha — mybarapetu nikananaha. Sihumo asiba ikyrikosokda. ²⁷ Tarabaja tsizubarēna ikykara. Kahyriziktsokzawy humo batu kaōtutsa. Kadisahawy nepykze kadisahawybyita karapa zikziykyk. Karapukrēta ikykara. Batu kasuku. Kasukbyita iwarik zikziykyk.

²⁸ Iwa sinini mynakara. Pibiyuhukutu Sesus tuktsa sizubarētsa soho mytsaty mytsaty mykara. Kapetu kasopyk:

— Kytsa asahi Sesus harere bo hȳ mykaranaha wasani ja mykaranaha — my. Sihumo kamy-pokzitsiarēta iwatahi mytsaty mytsaty mynakara. ²⁹ Aty Sesus harere bo hȳ mykara wasani baraty my zeka uta ituk kasukatsihikrēta. Batu myku tsimaha. Aty Sesus harere bo hȳ mykara imys-apybyita mykara zeka uta ituk kasukatsihikrēta. Batu myku tsimaha.

³⁰ Kytsa sizubarētsa kasoho humo sihyrinymyrētsa. Kazikwybyita sihyrinymyrētsa. Ana kino motsaso tsihikik. ³¹ Deus hi kaharere piwabykyze atahi tsihyrinymyrēta h̄y. Ikiahatsa bo batu mybarapetu my atahi tsihyrinymyrēta. Deus mymypehaka Sesus Kiristuzo. Katsaktsa ipe tsimaha:

— O Deus ikia zuba koiknybaktatu h̄y amys-apyrēnikita — tsimykaranaha.

³² Iwaze Damasko eze tuze sipehatsa Aretas inarokota atakta zikbeze tsihikik. Iwatahi iperyt-sitsa Damasko hokbowy baze zikuparahakanaha katsipa humo zikokty tsihikiknaha. ³³ Katukytsa ziktsumuēh̄naha. Unata eze zikoktyhyryknaha tsahi tsoromapeza eze tu iziksipikiknaha ape bo

niahā. Hokbowy buruk iknasik. Iknawak. Iwaze Damasko ekze ikparakik, iwa ikwakik.

12

Pauro Deus hudikhudikwy zitsotospykykze ziny.

¹ Uta ahabo motsasokoro — kamysapyrēta my — ahape mykara. Anaharere batu imysapy iwatuze motsasoko. Mypehakatsa isapyrēnikia zikwatahawy, hinibytatu zitsotospyk wa ha isapyrēnikia iny, ana soho ahabo motsasoko.

² Tubabatu katorise niytyk tseheze Deus hudikhudikwy bo zikoktyhyryk. Uta zikoktyhyryk ja. Zitsotospykyrykze zuba ja. Batu kanyhy. Deus zuba tsihyrinymyrēta. ³ Atsoko tasapy bo zikoktyhyryk tawa ihudikhudikwy bo iktsukze tisapyrēna. Utakta zikoktyhyryk ja. Zitsotospykykze ja. Batu kanyhy. Deus zuba tsihyrinymyrēta. ⁴ Anaeze iharere tisapyrēna iwaby. Anaharere ty kino batu tyso. Mybarawy ezektsa bo batu harere my. ⁵ Deus hi zikoktyhyryk iwatahi ustsā bo — Kamysapyrēta — my batu tyso. Uta kino kazikwybyita tu kytsa sihyrinymyrētsa ana humo hi motsasokoro. Kapunihikbyita tu ana hi motsasokoro. ⁶ Utakta — kamysapyrēta — my zeka wasani my. Batu katyrykmyita. Hawa ha ty wasania ty zuba ahabo motsasoko. Iwaze kaharere ty — kamysapyrēta — batu tyso. Ikiahatsa kasoho humo botu ahahyrinymyrētsa. Hawa zikzuruku naha humo ahahyrinymyrētsa. Hawa motsasoko ana humo kino ahahyrinymyrētsa. Kasoho tyka sosobyi my,

hawa sa kasoho mytsaty tsimykarana ha wasani my batu meky watu mytsaty tsimykarana ha.

⁷ Deus tahudikhudikwy bo zikoktyhyrykze isapyrēnikia tsizubarēna ikzinyre. Tawata iwaze Deus tapetu isopyk:

— Pauro isapyrēnikia ty ziny. Ana humo hi tozeka ja “aba zubata ja” my — niy. Iwaze Deus ziksininiwyky. Iharere humo Satanas pikmyitsapyriwyky iwatahi kamyitsapyrēta mozik.

⁸ Kamyitsapyrize harakykbyihi Deus pe iky:

— O Deus myzo tsikzorowykta! — iky. Deus bo ikzapykykyk. ⁹ Iwaze Deus kape niy:

— Ba zazorowoy. Kazikwy ty zuba abo nyny mykara. Akubyita tuze kazikwy ty puētsik abo nyny mykara ahumo kamypokzitsiarēta hỹ — niy. Iwatahi kamyitsapyrēta my ana humo hi kakurēta. Utsa kytsa pe:

— Utakta kapunihikrēta — my. Iwa ba ziky. — Kamyitsapyrēta tuze kakurēta. Pibytuhukutu Kiristu zikwy ty kabo nyny mynakara — my.

¹⁰ Iwa ustsakyt sa pe mykara:

— Kamyitsapyrēta tuze kakurēta hỹ. Kiristu pokzi kamyitsapyrēta iwatahi kakurēta. Iwaze kytsa kahumo myziakarakana ha, zikmyijaikikana ha, batu kanamyky, asaktsa Sesus harere bo batu yhỹ nikarana ha zikusyrykynaha iwatahi sinini mykara iwata tu kakurēta. Kazikwybyita tu mypehakatsa zuba tazikwy ty kabo nyny mykara — niy.

Pauro Sesus tuktsa bo paikpa mytsaty nikara.

¹¹ Kaharere ityrykmyita wata. Iki ahatsa kahumo tsiharereziubyikinaha iwatahi

pikbetesaka. Ahaokzeka utakta amy tohibyita wata. Asaktsa ahabo mybarapetu mykaranaha. Deus pehabyitsa tu mykaranaha sihumo ahakparawy asahi simyspihikbatanikitsa zuba mykaranaha. Ahaokzeka Deus pehakatsababatsa mytsaty ahabyitsa tsimykaranaha. Hawa mykaranaha utakta niwatihi mykara.

¹² Ahatuk ikapykyrykze hawa Deus pehaha mykara atsatu ikykara. Deus zikwy katuk zik-napykyryk ana kino ziwatawy. Amy ty kytsa batu zikaha Deus zikwy humo ikykara. Si-watawyhytsa humo ikiahatsa tsipybybaiknaha. Ahatukze kakubyrisorokrēta ikykara iwa Deus harere humo wasani zahahyrinymyryky ana kino ziwatawykyry. ¹³ Deus wasania ty ustsā Sesus tuktsa, asaktsa inazuzuknaha Deus harere bo pi-wabykynaha, sibo Deus pehatsa nitsasokoronahaze nisisapywykynaha ahatsa watsa bo ikykara. Asaktsa tahanamy ty sibo nyny nikaranaha. Iki-ahatsa batu. Ahanamy ty kabo batu nyny aha. Iwa ikzihikik. Ana kino batu tyso — O Pauro myhumo batu iakparawy — batu tyso. Aha humo kakparawy.

¹⁴ Utakta petok baba ahabo iknakozore. Abaka asiba mokymyky ahabozo. Ikiahatsa ahaokryrsaro ty ba zikzihik. Ikiahatsa zuba Sesus harere bo hyĩ tsimykaranaha mozihikik, ahanamy batu mozihikik. Ikiahatsa kahyrytsa watsa. Sizotsa tahahyrytsa okryrsaro humo pikorohyk. Sihyrytsa sinamy ty tahazotsa bo batu nyny zikaha, ana hi sizotsa batu simozihikik. Iwa hỹ. ¹⁵ Utakta pahatsumuēhĩ tsihikik, kanamy ty ahabo nyny my zeka ana hi mozikykuwyky.

Kytsa ahatsyhyryze pikbezenaha zeka yhỹ my ahahumo kamypokzitsiarēta hỹ. Ikiachatsa ja. Tsikaeni zuba kahumo ahakparawy.

¹⁶ Ikiachatsa kasoho ty tsimypamykysonahaze:

— Pauro mytukze mynamy batu ziaксе iwatsatu myokyrysaro ty ihumo nepyk iwatahi mybo mybarapetu nikara, nimyspihikbataka — tsimaha. ¹⁷ Kaharereziuwytša ahabo iksipehahik batu zahaspihikbatakanaha.

¹⁸ Kaharereze Titu ahabo zumu. Mytsy itukta niwatihi ahabo zumunaha. Asaktsa ahanamy ty batu tykse. Titu kawata, katsaktsa wasani tsimykaranaha. Katsaktsa ahahumo mysopyk tsimykaranaha hỹ.

¹⁹ Ikiachatsa hi:

— O Pauro tuktsa asa tu tahabetesaha tsihikiknaha — tsimaha. Mytsaty ahabyitša tsimykaranaha Deus okze ka tsimytsasokonaha. Ihumo zuba tsimybetesahakanaha. Kiristu nymywatawy ana humo hi tsimybetesahawynahaze ahatsyhyryze tsimytsasokonaha. Katsaktsa ahahumo mypokzitsirētsa, iwatsahi pahatsumuēhĩ tsihikiknaha. Ahapunihikrētsa tsimoziknaha ana hi tsimyzihikiknaha.

²⁰ Ahasoho bo mytsaty ziknakara. Ahabo pomoze ja mekywa tu tsimykaranaha. Iwa ha bo mytsaty mykara. Ikiachatsa kino niwatihi. Kasoho bo mytsaty tsimykaranaha, meky watu sa my. Ahabo pomoze ja tsimyharape sapybyikinaha ja. Ahazokdiharētsa ja. Awakytša humo ja tsipahaukanikinaha. Ahabo zuba ja mytsaty tsimynakaranaha. Tsikaharapehudizuikiknaha ja. Ahaharere

wabymybarētsa ja. Ahaharereziubyitsa tu metutu tsimopaparakanaha ja. Batu astsā bo tu mytsaty tsimykarānaha ja. Iwa tsimykarānaha zeka pahabetsak. Pahabetsakwynahaze ahasukatsihikrētsa tsimoziknaha. Batu ahaku.

²¹ Ahasoho bo paikpa mytsaty mynakara. Ahabo mynakozoreze ahahumo kasukatsihikrēta. Kytsa ahatuk zeka simysapybyitsa tu nikaranaha. Ustsā okeza bo nisioktyhyryknaha. Wastuhu kytsa makutsa tu mynaharapeokorokonaha. Ustsā nisimyibakanaha. Iwa tsikykarānaha zeka ana humo hi batu ahaku. Ahamysapybyitsa tu tsimykarānaha ty moewy byizeka kasikpybyrēta mozik. Deus okze ka ahahumo kasikpybyrēta.

13

Pauro Sesus tuktsa nisisukpehe.

¹ Abaka harakykbyihi ahabo mynakozore. Aba ahabo mynakozorezo. Deus harere papeu humo ziwatahaka:

— Aty zeka usta maku soho motsasoze: “O tohi batu mysapy my” ba hỹ taha. Petoktsa zuba harakykbyihitsa ja mopamykysokonaha iwa kytsa maha zeka: “O tohikta batu mysapy my” iwaze yhỹ tsimaha — niy. Iwa Deus harere papeu humo ziwatahaka.

² Utakta botu petok baba ahabo iknakozore. Asaktsa tahamysapybara ty batu moewy iwatahi iksibetsakak. Iwa mykarazo. Ahabo mynakozorezoze asaktsa tahamysapybara ty moewy ahabyizeka mysibetsakzo, sihumo kasakaniharēta mozik. Ustsā kytsa batu tysipeha niwatihi asa humo hi kasakaniharēta. ³ Utakta

Kiristu harere zuba ahabo motsasokoro. Ana hi tsinymyry tsihikiknaha. Atahi ahatukze tsipunihikrēta niy, atahi zikwy ziwatawy hỹ, ana humo kino ahahyrinymyrētsa. Utakta simysapybyitsa humo mysibetsakze ikiahatsa hi:

— O anahi Kiristu harere hỹ — tsimykarana.

⁴ Kiristu mybarawy eze zikzurukuze tazikwy zerekik. Iwaze kytsa zibezenahaze iharapatawyhyta humo zihyryzikiknaha izikwybyita zibezenaha. Deus zihyryzikpowy abaka izikwyrēnikita niyzikzo iwa ispituzo my. Katsa ituktsa tsimaha. Katsa kino niwatihi mybarawy ezektsa batu mypunihik. Abaka Kiristu harere bo zuba hyỹ tsimykarana haze Deus hyrikoso mytuk mynapykyryk. Katsa Korītio bo tsimopomonahaze izikwy humo mypunihikrētsa tsimoziknaha. Ahatsyhyryze izikwy katuk mynapykyryk iwatahi tsipahatsumuēhīekiknaha. Iwa hỹ.

⁵ Ikiahatsa hi ahasoho ty mytsatzyiutahaktsa! Ahape tu ahasopyk:

— Sesus harere bo ja hyỹ tsimykarana. Iharere humo ja ahaspirikporētsa. Deus hyrikoso ja mytuk mynapykyryk baba — tsimykarana. Iwa ahape tu ahasopyk. Ikiahatsa Sesus Kiristu harere bo hyỹ tsimaha zeka iwaze ituktsa tsimoziknaha ana humo kino ahahyrinymyrētsa. Iharere bo hyỹ ahabyizeka Kiristu batu ahatuk ziknapykyryk.

⁶ Katsaktsa Kiristu humo myspirikporētsa babatsa tsimaha zeka, iharere bo zuba pykyhytu hyỹ tsimykarana ana humo kino

ahahyrinymyrētsa, ana hi tsimyzihikiknaha.
⁷ Ahatsyhyryze Deus bo tsimypamykysokonaha.
 Katsahi:

— O Deus myzo Korītio ezektsa tysitsumuēhīkta!
 Simysapybyitsa nikaranaha anahi pimoewynaha
 iwa tysitsumuēhīkta! — tsimaha. Ikiahatsa
 wasani tsimyzurukunaha ana hi mozihikik. Utsa
 kytsa tihi:

— O Pauro tuktsa Korītio ezektsa
 nisihyrinymyryziukunaha iwatsahi siharere
 humo simysapyrētsa moziknaha — maha. Ana
 harere kino ba zikzihikik. Utsa kytsa tihi:

— O Pauro tuktsa Korītio ezektsa nisimyikinaha
 — maha. Ana harere kino batu waby icy. ⁸ Deus
 harere ba hawa tohi zikzukninaha. Ana harere bo
 hȳy tsimykaranaha iwaze usts a kytsa bo tsimysit-
 sumuēhīnaha zikaha, hawa wasani mykara ana ty
 kino hȳy mykaranaha tsimysitsumuēhīnaha.

⁹ Iwaze katsaktsa mypunihikbyize wasani
 tsimykaranaha. Iwaze ikiahatsa ahapunihikrētsa
 zeka mykurētsa tsimoziknaha. Iwaze
 ahatsyhyryze Deus bo tsimypamykysokonaha:

— O Deus myzo Korītio ezektsa tysitsumuēhīkta!
 Azikwy situk mynapykyryk iwatsahi
 tahamysapybara humo nymyzihikbyrinaha
 abaka simysapyrētsa babatsa moziknaha
 awatahaktsa — tsimaha. ¹⁰ Aba ahabo piwataha,
 papeu ty kaharaze pohyryktykta. Iwaze ahabo
 pomoze ba pahabetsakzo. Ahahumo batu
 kasakani Deus zikwy katuk mynapykyryk iwaze
 pahatsumuēhī ana hi mozihikik. Deus hyrikoso
 bo yhȳy tsimaha ana hi mozihikik. Atahi batu zaha
 my. Uta kino niwatihi. Ba pahabetsakzo iwatahi

papeu ahabo ziskyryk. Hawa taeze ahabo pomo. Iwa hỹ.

¹¹ O katukytsa kawatahaha ahabo asiba nepyk. Ahamysapyrētsa tynakaranahaktsa kytsa! Kaharere bo wabyziutaha. Tyharape pokzitsikinahaktsa! Sesus tuktsa atsawatu mytsaty tsimykarana. Ikiatsa tuk yhỹ tsimykarana. Iwaze Deus ahahumo tsimypokzitsiarēta, atahi pahahyrinymyryky ihumo ahakurētsa tsimoziknaha. Deus ahatak tawahi mynapykyryk hỹ.

¹² Tynaharape haprykyknahaktsa iwa ustsā pe hawa taharapepokzitsikinaha tsimymywatawynaha. Asaktsa Sesus humo sispirikporētsa katuk hi:

— O Korītio ezektsa humo myhyrizikbarētsa — mykarana.

¹³⁻¹⁴ Ahatsyhyryze Deus bo mopamykyso:

— O mypehakatsa Sesus Kiristu Korītio ezektsa tysisapywyky. O Deus myzo sihumo tysipokzitsiukta! O Deus hyrikoso situk tawahi mynapykyrykta! — my. Niwazuba.

Pauro niy

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

2f0260ea-5969-5180-9ac5-183d63a989f1